

漢書門類		四七二	三六二	六九冊
------	--	-----	-----	-----

內閣文庫		漢書類	四七二	六九冊	三三函
------	--	-----	-----	-----	-----

內閣文庫		番號	漢 472
冊數	69 ( 12 )	函號	362 69



文翰類選大成卷第二十五五言古詩目

元

許仲平 二首

郝伯常 三首

周景遠 二首

牟獻之 三首

姚公茂 一首

王士熙 一首

杜若川 一首

趙子昂 五首

鄧善之 一首

元裕之 七首

劉夢吉 九首

劉祁 三首

李仁卿 一首

林景熙 一首

盧處道 一首

苟宗道 一首

何得之 八首

何太虛 八首

安熙 四首

虞伯生 十三首

貢仲章 一首

馬伯庸 一首

范德機 四首

陳子山 一首

余小谷 四首

夏伯成 一首

胡伯友 五首

余叔容 二首


方德昭 二首

黃誠父 三首

葉仲輿 一首

董鑑翁 四首

汪真率 四首



胡汝為一首

江彦章四首

吳楚望一首

趙德元一首

汪叔達三首

李仲美一首

程子正一首

胡彥良四首

甘思學三首

楊煥然一首

吳維申一首

胡士則一首

趙半閒二首

鮮于伯機一首

吳幼清一首

滕玉霄三首

袁伯長四首

盧彥威三首

張伯遠一首

揭曼碩計二

黃子肅九首

薛宗海六首

韓明善一首

黃晉卿六首

陳眾仲二首

傅汝礪四首

劉文廷一首

張仲舉一首

甘允從二首

余廷心二首

周伯溫一首

徐天逸三首

吳彥輝一首

倪元鎮二首

楊西亭一首

陳一一首

楊仲如一首

揭伯防一首

孫冠仁一首

吳敬庭一首

吳師道一首

胡梅畊二首

周德可一首

汪公濟一首

汪一亨一首

楊信可一首

馬易之

陸天錫一首

留若愚一首

錢思復一首

錙子輿一首

楊廉夫三首

盧廷舉一首

孫元實二首

張夢辰一首

釋象原一首

余士平一首

蔣季和一首

張志道一首

錢伯全一首

李象賢一首

釋西伯四首

周履道一首

蘇昌齡一首

曹新民一首

孫履常四首

劉師魯一首

黃松瀑一首

于介翁一首

揚季一首

陳直方四首

陳濟民一首

周本心一首

祝蕃遠一首

揭希遠一首

立東野一首

彭元亮八首

湯子文一首

董拍大	一首	張士敬	二首	張伯遠	三首
徐一甫	一首	陳元弼	二首	江叔載	一首
湯思敬	一首	王道章	二首	程景伊	一首
馬子尚	一首	常仲微	一首	熊勿軒	二首
劉聲之	一首	胡汲仲	一首	毛靜可	二首
李仲公	三首	杜仲梁	三首	何夢桂	一首
劉會夢	一首	劉衡	一首	尹仲明	三首
李季和	二首	張惟中	四首	丁鶴年	八首
吳立夫	七首	許益之	十四首	葉景南	一首
張光弼	十四首	黃元鎮	二首	張伯雨	一首
釋碧虛	一首				

文翰類選大成卷第二十五目錄

文翰類選大成卷第二十五

左長史上海李伯璣編輯  
伴 讀慈谿馮厚校正

詩類 五言古

有感

許仲平

嬌兒未成人 痛苦不肯退 憂傷動中懷 慘慘心欲碎 老  
妻情更惡 中夜泣相對 何如早還歸 山陽墳壟在平生  
所願心展轉 不得遂 遂十年 誤同遊 回首只多愧 病連肺  
肝深 因覺妻子累 悠悠故鄉情 滴滴眼中淚 孤死知首  
立 人生戀鄉土 我心久焦勞 宿疾安能愈 所愧還故鄉  
遺骸近先祖 他事足嗟嘆 西風動寰宇 歸興不可歇 歸  
程待何時 悠悠故鄉心 一千里 馳西風 動霄漢 慘慘

令人悲况我多病身天涯久栖遲交游義難忘豈忍輕  
別離重念立壘遠嬌兒正愚痴因循死異邑後世將何  
遺所願經營日及此未全衰極桑墻以下開畦水之涸  
既得紓困難且可爲鋤基幼無孝弟稱老無恩澤施唯  
有近先塋一死乃其宜諸君苦留連雅意金蘭期我自  
無遐福形骸變焦萎生平尚求友得友還差池中懷起  
愁嘆欲別難爲辭試將問吾廬何日當匹之緩急有擬  
議行止更無疑作詩敘悃款爲報吾親知

別西山

大山如蹲龍小山如踞虎煙嵐鬱蒼翠遠近互吞吐我  
來薊門居遨遊成樂土策杖望朝雲卷簾看暮雨佳意  
豁塵腥勝槩入談塵使我鬱陶消使我勞瘵愈生平鄙  
吝心一洗出千古回首聲利人何殊坐圜園遠殺非素  
懷况有跋涉苦吟鞭裊東風遲遲如去魯芳菲二三月  
追遊盛梅塢歸來願無違一觴期對舉

和陶形神影三首

郝伯常

萬象生道區受形各有時運會迭來往寢揚誠壞之妙  
合我初凝爾亦即在茲隱見陰陽中幻化無了期寤寐  
一生死寂然匪爲思我勞爲有此爾苦勿涕洟請看聲  
與響相隨復何疑大都本無有相贈徒費辭右形贈影  
靜陰乃道影範圍無巧拙大車轉通達轍迹豈能絕妍  
醜君固有隨君非慕悅日月相代明焉能與君別思君  
不如我君沒我不滅生死無加損得失豈內熱因物不  
逐物原原靡衰竭君終復隨我茲時見優劣右影答形  
出入生死閒妙物不自著物物弗爲物超然變新故二  
子一醯雞羊負相胷附成壞不在已安用相告語元陽

初化時靜一是好處在在靡方所悠悠無定住陶老信  
達者得失委命數全神乃遺形種秫修釀具一醉樂有  
餘陶然忘毀譽醉夢曾弗辨町畦都削去既不將不迎  
亦何憂何懼能逃世上名豈有身後慮右神釋

季札廟

周景遠

名馳聊城人  
察院御史

古人不可及冥晦秉淳德一動成功名煥爛照無極李  
子賢大夫劍佩遊上國微乎禮樂意洞達有精識迄今  
二千年欲繼難再得我行故城闈寂寞弔遺迹廟古丹  
雘漫階空苔蘚積翔禽集中雷懸網掛虛壁鄉人尚加  
敬瞻仰自夙昔歲時修饋祀塵土走巫覡吾徒志為學  
不肯競朝夕景慕將何如江海起涓滴

館娃宮

吳中山頗多戢戢至莫數靈巖號神秀踞地若蒼虎呀

然啓坳窪迫窄剝洞戶上騰空濛氣日夜為霧雨流傳  
館娃宮泯沒復何所琴臺耀殘照香徑存荒莽當時競  
繁華至此益淒楚子胥名世士樹立智且武殺身暴其  
君於國竟何補哀哉實忠憤金石為消沮丈夫各有志  
豈意濟艱阻夔契亦斯人榮耀映終古

九日和陶

牟獻之

名嶽陵  
陽人

驚飈墜落葉意氣何軒軒秋高百卉盡寂寞但空園何  
異富與貴變滅隨雲煙緬懷陶彭澤平生極幾研朗詠  
貧士詩相對如晤言今人之所恥古人以為賢

翁媪兩白髮蕭然老江干大兒荆溪遊折腰豈為官諸  
兒走異縣亦各營一食別多會面少端復坐飢寒諸幼  
且眼前笑語開我顏勿問賢與愚懷抱俱相關

和趙子俊秋日閑居二首

窘步殊蹒跚戶限久不逾若或繫維之愧彼空谷駒  
然念平生我亦酷信書所得不償失每與憂患俱飲水  
飯脫粟此意豈願餘貧實為我累舍貧將焉如堪嗟嗜  
利者死甘謚為愚

九日忽已過霜薄陽光晞未漉頭上巾先典篋中衣時  
物上有菊採掇頓爾稀對酒胡不飲坐看白日飛五勝  
更囚旺萬事誰是非且復進一觴酒盡情依依晚蝶抱  
孤蕊無乃昧先幾

題號國夫人夜遊圖

姚公茂名樞柳城人  
學士承旨

宴安懷鳩毒蕩佚國將亡緬思天寶載聲色迷君王朝  
政出多門十九分權綱其誰堪炙手秦號連諸楊板拊  
勢莫比所冀保椒房宮中陪宴樂晝短疑夜長重為長  
夜遊細馬馱寶裝胡不秉明燭冥行撤禮防一從此風

熾野鹿踰宮廡五岳出洛泝四海同慘傷維時所貴顯  
赤族亦罹殃馬嵬脂粉暗岷山涕泗滂明年雖幸還大  
海翻田桑山河增慘澹日月銷精光問民瘡痍中哭廟  
煨燼傍女寵禍何酷百悔不一償在宮豈足擬于茲不  
可忘

送郭子昭淮東經歷

王士熙名繼學東平  
人浙東廉使

夫君黃鵠姿氣排青雲上嵯峨栢樹枝冰霜激清賞鋒  
錯太阿鮮韻叶玄石響淮海今勝區疆場記疇曩省俗  
出凋瘵主畫酬鞅掌南浦春波深迢迢桂舟往論交心  
獨傾撫別意增惘古殿瓊花開題詩寄遐想

述志

杜若川

寧枉百里步曲木不可息寧忍三日飢邪蒿不可食雖  
云食息頃便分淑與慝志士當莫年聞道轉歷要使

此一身如琢復如滌整冠與納履微嫌貴躋別未若瓜  
李地絕不見吾迹

古風十首

趙子昂

詩亡春秋作仲尼蓋苦心空言恐難託指事著以深大  
義炳如日萬古仰照臨鳳鳥久不至楚狂乃知音愁來  
不得語起坐彈吾琴

周衰有戰國紛紛極荆榛黃金聘辯士駟馬迎從人朝  
爲剝骨離暮作歎血親終然志力屈奉身俱入秦

相如賦大人出語頗奇怪飄然凌雲意過耳誠一快誇  
言入無際自覺塵俗隘安知翻成勸何用名爲戒

自有天地來蓬萊幾清淺人生空皓首舉世誰得見瑤  
臺在何許渺渺煙波遠方舟不可渡使我空展轉

絕代有佳人被服綺與紈蛾眉秀聯娟吐詞馥若蘭清

歌啓皓齒瑤琴發哀彈一彈再三嘆聽者涕洟瀾借問  
誰家子爲言本邯鄲

秋風吹庭樹故葉紛已墜明月耿夜長草蟲促經緯四  
序苦不淹少壯何足貴展轉復展轉寤寐不能寐昔爲  
閨中秀今作市門鄙豈無膏與沐甘心得憔悴

山深多悲風日暮愁我心玄雲降寒雨松柏自哀吟人  
生百年後奄然閱重陰念此每不樂天路何由尋僊人  
幄佺童逍遙在青岑奈何不爾思委命重黃金

海中有奇樹粲粲珊瑚枝由來植物性無脛可推移如  
何石氏子樹之白玉墀洛陽經幾戰金谷久荒夷徒令  
千載下聞者爲傷悲

烈風號枯條落葉滿周道原野何蕭索川流亦浩浩離  
居日以遠懷思令人老功名會有時生世苦不早顧瞻



靡所騁憂心怒如擣

浮雲何方來不知竟安之飄飄隨風去汗漫以爲期自  
昔功名士往往事驅馳白駒空谷中誰能加繫維皎皎  
難見容翻受世妍蚩虛名誠無益不見斗與箕

逸民詩九首

驅車秣駑馬吾將適齊國聞有魯連子侗黨好奇畫一  
談秦師走再說聊城拔功成不受賞高舉振六翮布衣  
終其身豈復爲世役茫茫千載遠安往訪遺迹躊躇東  
海上向風長太息

四時相代謝榮耀安足恃瓜田引新蔓不見桃與李知  
士解其會遇坎當復止邵生故秦吏乃亦睹茲理賢哉  
感我懷三歎不能已

子真初亦仕歲晚乃逃之區區南昌尉上疏忘其卑忠

言不見用耿耿當告誰飄然棄妻子終身與世辭抱關  
甘貧賤所遺莫我知至今九江濱清風激群黎神僊信  
茫昧此士獨不疑孤雲無所在逝水何時歸遐思一矯  
首張望無由期

悠悠空山雲泱泱長江流廊廟意不屑山澤聊淹留故  
人在天位高步追巢由豈曰子無衣辛苦被羊裘東京  
多節義之子乃其尤窮居雖獨善輔世豈不優

汪汪千頃陂不爲人濁清道周言行表蕩然無得名誰  
言牛醫兒乃是人中英當時無聞言後世流德聲思之  
不可見使我鄙吝萌淳風久已漓此意豈復存時無君  
子者雖賢寧見稱

南州有高士食力事耕稼優游聊卒歲不矯亦不隘大  
木行欲顛緇纒豈足賴何爲諸老翁栖栖不違舍斯言

非無見明哲自高邁誰能懸一榻待子來稅駕  
鹿門何亭亭下有避世賢鳳雛隱中林卧龍蟠其淵一  
朝起高翔斯人獨深潛功名不可為我志久已安一聞  
耆舊傳使我心悠然

黃鵠羽翼長一舉思千里幼安本中原乘槎走東海舉  
世方尚同遠引存異志流風漸異俗敦禮化鄰鄙子魚  
平生友胡乃不相委

塵事非所便田園久見招歸來三徑中蔚蔚長蓬蒿雖  
有荷鋤倦濁酒且陶陶茫茫大化中委運將焉逃唐虞  
去已遠由來飛一朝粲粲霜中菊采采忘其勞

雜詩

四時更代謝物化常隨之春華曾幾何歲月忽如茲嚴  
風動高樹百草俱已衰人生况有役憂患乃其宜棄捐

勿復念出入由化機安得松喬術邈焉世相違

遊南山憩山下人家和韻

驅馬南山陽下馬望絕巘解衣坐盤桓言就蓬廬偃非  
無扳援力興盡自應返天高暄風息木落歲華晚勢阻  
乏遐觀趣得心自遠不有君子辭何用杼繡繆

送程運副之杭州

鹽為生民食日用猶水火雖非飢所急一日無不可但  
今商賈便那復愁國課數年人壞法貪欲肆偏頗利多  
歸私室民始受鹽禍爾來又計口強致及邑裏樵醜窮  
滴歷征商及避邏東南民力竭此事非細瑣朝家更政  
化選擇堪負荷君為尚書郎精白色嗟嗟明當戒行李  
往理吳越柁祝君無別語編戶要安妥湖山多勝處亦  
可供宴坐談笑尊俎閒佳聲滿江左

趙村道中

昔年干戈動兵塵暗三吳長江已無險智勇亦難圖築壘依平山謀國一何愚楨榦群林空遺址莽丘墟至今蓬蒿下猶有白骨枯天陰萬鬼哭慘慘荒山隅興亡自有數不敢問何如獨怜野菊花立馬為躊躇

詠懷二首

美人涉江來遺我雲和琴朱絲絢玉軫古意一何深長歌和清彈三嘆有遺音逸響隨風發高高不可尋奈何俚俗耳折楊悅哀涕此道棄捐久沈吟獨傷心

明明秋夜月流光照羅幃隱憂從中來起視夜何其草虫催杼軸札札鳴聲悲良人遠行役萬里歸無期予髮已曲局膏沐久不施回身入閨房愁思當告誰獨有今宵夢迢迢為君馳

雨中次范德機見寄雜興韻

鄧善之名文原巴西人

國子祭酒

窮巷積陰雨離居寡悵情安得埽埃風逍遙余上征長日有逝川春花無晚榮永懷山澤居好遯潛英聲於陵方濯園龐公不入城此意豈忘世詠歌以濯清今我夢江國嗷嗷鷓鴣鳴不憂芳草歇但恐白髮生歸休企前哲矢言著貞誠悠悠莫識察思子携手行

箕山

元裕之

幽林轉陰崖鳥道人迹絕許君棲隱地唯有太古雪人閒黃屋貴物外祗自潔尚厭一瓢喧重負寧所屑降衷均義稟汨利妄智決得隴又望蜀有齊安用薛干戈幾蠻觸宇宙日流血魯連蹈東海夷叔采薇蕨至令揚城山衡華兩丘堙古人不可作百念肝肺熱浩歌比風前

悠悠送孤月

耕讀軒

東帶見督郵甘以辭華軒嘯傲南窓下且樂我所然斜  
川今在亡問津有遺編行尋柴桑里遂得桃花源桃源  
無漢魏况復羲熙前讀書與躬耕兀兀送殘年淵明不  
可作尚友乃為賢田家豈不苦歲功聊可觀讀書有何  
味有味不得言遙知一尊酒琴在已無絃

飲酒二首

西郊一畝宅閉門秋草深床頭有新釀意慳成孤斟舉  
杯謝明月蓬華肯相臨願將萬古色照我萬古心  
去古日已遠百偽無一真獨餘醉鄉地中有羲皇淳聖  
教難為功乃見酒力神誰能釀滄海盡醉區中民

後飲酒二首

少日不能觴少許便有餘比得酒中趣日與杯杓俱一  
日不自澆肝肺如欲枯當其得意時萬物寄一壺作病  
知奈何妾婦良區區但愧生理廢飢寒到妻孥吾貧蓋  
有命此酒不可無

客從崧少來貽我招隱詩為言學仙好人閒竟何為一

笑顧客言神仙非所期山中如有酒吾與爾同歸

任運堂詩

官職有何好凜凜蹈危機車塵及馬足捧手仍低眉棄  
去何足道無從脫繫維不如聽其然歲晚倘可期上堂  
壽慈親兄弟如墳麓菽水足為樂况有甘與肥人生天  
地閒長路有險夷遇險即欲避焉得皆通達君家北山  
翁百世留清規樂天而知命行矣君何疑

仙臺

劉夢吉

碣石來海際西南奄全燕中有學仙臺燕平欲升天燕  
平骨已朽遺臺猶相傳雖復生青松歲久摧為煙極目  
望海波不見三山巔三山巨鰲簪仙人蟻虱然使無不  
足論信有亦可憐大塊如洪爐金石能久堅天地會有  
盡何物為神仙空山無笙鶴落日下飢鳥今古非一臺  
浩歎秋風前

泛舟西溪

萬山倒滄浪一葉凌嵯峩嵯峩為飛舞翠影如婆娑輕  
陰散雨足淨綠生圓波人閒碧海幻老眼青銅磨風雲  
幾千古辨此雨一蓑溪南有幽人鼓棹前山阿煙深渺  
無處月色浮松蘿

重遊北溪

蒼黃澹野色草樹含清暉林居隱葱蒨晴嵐散霏微歸  
雲有真意鳴禽發天機勝處必深會輕鷺豈虛揮山泉  
來何從北望空依依

飲山亭

飲人不飲酒千載誰與期賴有此山色我杯時一持西  
郊遠市井林亭對山暉主人知愛客釀酒無虛時佳客  
麟鳳然人亦難致之君亭有吾山招飲當不辭

和擬古

朝遊易水側步上燕臺荒燕王好神仙不見金銀堂江  
山古神器海色圍蒼茫哀哉王風頽日化爭奪場救世  
豈無人賈志歸北邙撫此重長歎青山忽軒昂呼酒樂  
今朝徃事置一方遙知蓋棺後亦起千載傷

經古城

我行常山尾高城墮吾前按轡覽形勢依依見金燕易

水開前襟飛狐連右肩遙想豪傑場撫已增慨然新  
過我傍一笑如相憐指城前問余考古今幾年沈思未  
及答行歌入蒼煙

西山

西山澹無姿中有羲皇前翻思太古人事業何不傳  
墳亦何罪世遠成灰煙紛紛後來人暮死爭朝妍勲名  
史一策學術文千篇古人豈不然後有無窮年惟餘方  
寸心天地相後先

翟節婦

兵塵浩無際烈士難自全婦人無九首志欲不二天燕  
山翟氏女既嫁夫防邊一朝聞死事健婦增慨然生有  
如此夫早寡非所憐求屍白刃中負土家山前事去哀  
益深義盡身可捐無兒欲何為所依惟黃泉鄉鄰救引  
决烈日丹衷懸誰辨節孝翁重賦睢陽賢我昨過其鄉  
山水猶清妍聞風髮如竹飄蕭動踈煙千年吟詩臺我  
我太寧巔為招馮太師和我節婦篇

黃金臺

燕山不改色易水無新聲誰知數尺臺中有萬古情區  
區後世人猶愛黃金名黃金亦何物能為賢重輕德輝  
照九仞鳳鳥纔一鳴伊誰腐鼠棄坐見飢鶩爭周道日  
東漸二老皆西行養民以致賢王業自此成黃金與山  
平不救兵縱橫落日下荒臺山水有餘清

古意

劉祁

秋江有芙蓉顏色好鮮潔褰裳欲采折水深不可涉嚴  
風下飛霜芳艷空凋歇悵望一長嘆臨川無桂楫  
懷長源

涼月夜如水秋風吹紫蘭獨居悵無聊佳人阻河山  
山邈千里相望何時已雲橫鴈影沈露下虫聲起烽火  
照中州西南殺氣浮君居劉山下果若向時不人生有  
離別但惜知音絕匣內卧青蛇光芒射秋月汴水碧參  
差葉飛空樹枝如何相憶處還值暮秋時

送雷伯威

朔風起天末落木鳴空山水霜正凝返游子百里還出  
郭送將別徘徊上高原如何睽離情對此芳歲闌壯士  
志四方不須涕沈瀾人生非山海會面亦不難願子崇  
明德餘功振文翰長因東南鴻惠我金玉言

觀主人植槐

李仁卿

主人有佳樹移植庭之隅繁柯雖翦去不敢觸根株朝  
漑復夕灌乳井幾成枯諷諷角弓詩古人能起予愛樹

尚如此愛士當何如

南山有高樹

林景熙

南山有高樹寒鳥夜繞之驚秋啼眇眇風撓無寧枝託  
身未得所振羽將逝茲高飛犯霜露低飛觸茅茨乾坤  
豈不容顧影空自疑徘徊向殘月欲墮已復支

寄蕭徵君惟斗

盧處道

名摯涿州人號  
疎齋翰林學士

秦中幽勝地迺在終南山磐石負磊磊清泉散潺潺侃  
侃古君子亶亶泉石閒圖史紛坐隅衡門畫長關種菊  
餐落英襲芳佩秋蘭道腴德充符怡然有餘歡鳴鶴時  
一來似愛孤雲閒孤雲不能飛鳴鶴遂空還澱澱桃李  
艷鬱鬱松栢寒羲和駛春輝歲晏霜露繁感物有深傲  
懷哉邈難攀

蔚州元氏怡齋

苟宗道

八元乃八龍疑若瓊樹林難兄復難弟感激恩義深室  
家宛相好如鼓瑟與琴翩翩鴻鴈行錚錚鸞鳳音二王  
一品題價重雙南金終當仕虞朝藹然列華簪要在風  
俗淳不異古與今他人有兄弟聚散如飛禽閱牆不相  
能干戈日相尋尺布斗粟謠行路為傷心常棣廢已久  
角弓義湮沈因書怡齋詩以為友于箴

感興二首

何得之名失曰平人

飲酒莫罨醜結交當求知論人先論行相馬不相皮一  
諂人何敢三讒親亦疑投身入屠釣猶勝坐書癡  
人皆欲富貴我豈願貧賤青雲一差池如藥弗瞑眩幼  
學苦不多夜思曾得半今也髮盡白梳頭雪滿面長恐  
愧鄉閭一朝死愚懦

招賈元播馬德昌飲

積雨釋炎熱涼飈變清商薄帷納朝景倏爾頽西廂念  
我二三子不來復一觴言笑吐蘭菊芬芳粲中堂仰慕  
不昨日忽別若殊方况各迫桑榆何以求夕光

對酒

古人不我俟不共此酒醇此酒復易盡不能俟後人並  
世有不察異代若為親茫茫宇宙閒此抱難具陳惟應  
空中月分留大江濱

招暢純甫飲

地白雪方作城烏夜始啼風枝久不定達曙未能栖長  
安多逆旅客意勢連雞豈不懷其珣念子寒與飢我甕  
酒初熟葡萄漲波黎野老日無事出望幾千回如何不  
見來覆此紅螺杯

老病



老病積漸來筋力日覺墮南園一步地杖藜不能過階  
前宿雨晴屋角紅日大不是賣花聲曉夢誰驚破

莫吟

獨老朝朝出或醉莫未歸高樹挂新月山妻候柴扉飲  
伴更相送欲辭意難違感此鄉曲情淚下忽霑衣

野性

野性等麋鹿長林足遊盤焉知廊廟器我我魏其冠有  
時一壺酒花下自成歡妻孥儘辛勤生理固其然我今  
雖白髮敢不思古賢

風雨

何太虛

名中臨江人

池上風雨來柴扉人迹絕隔水煙氣生林峯半明滅蛤  
吠秋草深魚驚晚荷折孤坐倚床微紅隱天末

知非堂夜坐

前池荷葉深微涼坐來爽人歸一犬吠月上百蟲響余  
非洽隱淪隙地成偃仰林端斗柄斜撫心獨悽愴

西湖山

峩峩西湖山靈秀入空碧蘿陰轉累磴松色清幽石微  
霞生絕徑飛鷗洒歌壁鶴鳴巖光動花落雲影坼危椒  
登古壇百年此一息聲影混大荒不見興滅迹剛風三  
天寒元氣萬里色悵望仙子期凝神撫玄極

游穆山

秋陰出南郭佳色來遠山悠然度野水却宿前林閒  
氣統幽步相携上屨顏行穿綠蘿遠共愛青杉閑已窮  
高原路忽得雙石關飛煙帶香氣深木藏幽潺景晏鍾  
磬寂桂花滿苔斑道人一尊酒時聽風珊珊多悟從此  
始塵緣諒能刪空廊對微雨亦復不知還

贈元復初

暖雲深青堤光風轉芳甸遠在天一涯幽沈限聞見點  
點秋歸鴻翩翩春來燕天路萬里通胡寧絕遐瞻竒姿  
奪南國悵望愧踈淺良會尉宿心願君畢歡宴

發新淦

振衣上野航回首謝山阪日澹秋水空風清片帆遠沙  
光侵岸發峯影隨人轉前渡煙火深離亭今路緬

招仙觀

逶迤溪南路窈窕招仙谷空堂兩道人殘碁映深竹一  
葉響踈籬雙鴉啼高屋出門隨歸人遠燒在山麓

宿田家

村暗煙火生林深雞犬靜麥花如積雪月色淡相映鄰  
家夜汲歸寒蛩滿幽徑

擬古次韻四首

安熙

中州有寒士塊然守空堂清貧久有信壯懷殊未央豈  
不願馳聘冒雪凌風霜振策萬里途超忽追鵬翔未念  
同懷人渺在天一方悵望不可見慷慨發清商獨處誰  
晤語百感推衷腸人生諒難必且莫徒悲傷

采栢空巖下倚竹荒庭前人生非金石君心詎能堅君  
心或有渝賤妾終不疏天地一瞬息今古一長途借問  
離別苦君心竟焉如不見園中樹日日爭華敷秋風一  
夕至已逐嚴霜枯歲晚不得去山空難久居

崑崙一何高出此無窮河遙遙何所往不啻萬里多一  
意在朝東日夕無停波遠游計不早壯志成蹉跎夫君  
不我顧鬱鬱將如何覽物悟物變端居閱年華興來展  
遐眺緩步空山阿四顧渺塵世杉栢紛森羅吾樂成何

極憂子獨長嗟眷焉誰晤語一笑空煙蘿

人生有定分所貴能樂天自輕失所守欲進安敢前思君重思君此情誰與宣舉頭見明月顧影徒自憐終當謝塵世洗心聞澗泉

題上饒方瑞伯可竹軒

虞伯生

江上多羨竹所至山谷盈獨在君子軒猗猗有餘清特達遂直氣虛中絕塵情比立既不阿均長亦無爭雲來表文采風至發音聲所以宜治世參差爲鳳鳴慎戒自剪伐泯然負生成

題商德符華山圖

昔祠雲臺館行穿御塔栢夕陰嵐氣深重碧照行客獨訪張超谷漸覺巖險迫冰生玉井頭日射仙掌側豈無鐵瑣懸翻身若飛鶻恐煩華陰令不柰昌黎伯王事况有程車馬何忽忽流觀終南山周覽天府國爾來十七年欲往不再得山河想邈悠傷殘轉蕭索摩挲商老圖彷彿希夷宅高哉蓮花峯白雲澹秋色

次韻袁伯長賦陶心

憶昔白雲君高居保黃寧夕煉黃帝鼎晨註神農經群真時滿座逸響每盈庭寸田既無畔幽關那有扃飛凌萬物表婆娑垂帶鈴歸來塵世外曾孫宴虛亭所志在高遠三峯列青冥頽然得所止一念三十齡崑崙安明珠旭日曜帝青盤桓有童子松根求茯苓

于仲元舍賦紅梅

白雪不成夜丹霞遂崇朝妙質承日映飛英向風飄醉來紅袖近歌罷綵雲消揚州問何遜何似董嬌嬈

題儋耳東坡載酒堂

翳翳儋耳城歷歷枕榔樹百年遺故立新堂設賓作清  
風海上至朝陽在庭戶丹山五色鳳覽德屢來下

盜發亞父冢

盜發亞父冢珽劍寶累之冢開珽氣盡獄吏書盜辭盜  
言惟見珽寧知亞父誰項王不相信弟子遂輿尸黃腸  
下深錮千載復何為大河在城東落日在城西過客立  
城下躊躇望安期

杞菊軒

高軒何所植杞菊交根枝紫實既秋熟黃花亦晚滋嘉  
名信可愛可以樂予飢此邦號富庶士賈志懷資蕭條  
山石閒誰復見惇嫠遺脫兼并餘推剝無完肌縱守百  
畝受寧得安耘耔種此跬步內庶無征奪思採擷勿違  
節烹茗貴有宜三咽可千歲迢遙奉天隨

月出古城東

月出古城東海氣浮空濛車騎各已息宮闕何穹隆牧  
馬草上露吹笳沙際風帳中忽聞雁傳令鼓雕弓

寄題周氏水木清華亭

中流汎蘭柁望彼嘉樹林落日蕩野水浮雲生夕陰魚  
游戀芳藻鳥鳴在幽岑為樂恐易老吾將脫朝簪

趙千里出峽圖

巨舟臨峽口眾工志如一各以所操濟雖危萬無失所  
憂至平曠玩肆生縱逸母俾持釣翁倚岸三太息

出直次韻

月下白玉階露生黃金井疏條栖鵲寒衰蕙流螢冷戀  
闕感時康懷歸覺宵永晨鍾禁中來白髮聊自整

夜直賦得金鴨燒香

黃金鑄為鴨焚蘭夕殿中窈窕帶斜月逶迤動微風綺  
席列珠樹華燈連玉虹無眠待顧問不知清夜終

哀陳童子

南山有鳳雛飛來上林樹祗承朝陽輝不食秋夕露珠  
零海氣盡壁毀月光曙巫陽不能招荔丹滿洲嶼

讀伯庸學士止酒詩

貢仲章

名奎宣城人江西提舉

今晨不可出大風吹我帷陋巷泥沮如空墻雨淋漓研  
朱課兒書冥思解群疑敲門童子來袖有止酒詩讀之  
至再三擊節喜且悲若飲以玄酒揖讓陶唐時我我古  
冠裳執彼璋與圭短褐纔掩脛藜藿空忘飢風雅久已  
衰作者微君誰嗟我重景仰老大將何為

書上都學宮齋壁

馬伯庸

齋居芹宮旁永日少人迹清心慕古躅簡編頗紬繹徒

自傷迷民位卑力莫及苟祿亦可羞吾將反蓬華

節婦王氏

范德機

名栲臨江人憲司知事

妾年四三二始識月團團十二學女工刺繡如鴛鸞十  
九嫁夫家事姑施衿釐夫壻良家兒世籍為王官雖聯  
朱紫貴不習綺與紈過庭執詩禮開口若驚湍風儀在  
一時爭作玉人看天地忽降毒摧折青琅玕回首四十  
春景光若流凡貞心守松柏芳性軼芝蘭落月簾帷曙  
西風機杼寒沈思往昔事淚下紅闌干豪客至茅屋舉  
家竄林巖入房衛病姑身犯白刃攢相向義憐釋視死  
色無難親知為歎息保社為辛酸欲與上州府為妾旌  
門闌妾寔無所願所願在所安婦人往從人阿母涕洟  
瀾送行遺之語敬順無違歡匹偶固有時寧知憂患端  
辛苦蹈物變豈羨身獨完殷勤謝舊故聞者摧肺肝

贈安西王奉常

車聲何軋軋去我亦翩翩借問車中人幾時到秦川秦  
強數千里西與雲棧連行人秣過烏猿啼上青天長安  
古帝州宅土腴不偏聞君荅平昔宦遊抵晏眠十齡涉  
文史十五懷家氎二十學壯遊五十綴朝聯奉常老掌  
故今已二十年功業晚何就蕭蕭髮垂肩天子念逢掖  
錫官頗靜便紫衣縮墨綬此是車中綠飄颻上都門白  
馬錦連乾舉按招青山孟光老猶賢大兒坐車軒小兒  
調馬羈中兒又絕好國語荷珠圓旦夕候君至買舍清  
渭壩此皆足尉意月食官俸錢俸錢足養親親自育圭  
田人生慕富貴富貴翻受憐不有鍾鼎食亦無膏火煎  
前日三市事目擊心凜然當時氣凌人不得呵烏鳶觀  
君浩蕩去萬事當棄捐孔子不西行及河軌載旋今君

涉河汜西路方繇繇終南與嵩華是中多神仙仙掌出  
浮雲上有三峯連真人玉拄杖挂在明月弦便當往從  
之吸景升太玄金鼎交龍虎使我神完堅奈何二三月  
百憂集離筵空花如錦機野色交相鮮楊柳亂愁思萬  
條散青煙我不酌美酒敬讓故人先搥碎琥珀杯獨洗  
春風前春風澹無言徒以別慮牽別亦無所慮所慮應  
當宣願及相思時中腸鬱久纏爲吹雙紫燕銜書到君  
邊矯矯蕭徵君珠貝藏龍淵一別如列星隨天夜移躔  
鳳有五色瑞時下岐山巔請君問起居歸來定何如  
苦熱懷楚下

苦熱不可極念此西南風誰云顯氣遠乃是庭戶中我  
家百丈下井上雙梧桐向夕集歸鳥未秋足鳴蛩自從  
別家來江海信不通宛宛維桑思願隨孤征鴻夜夢白

髮親歡笑携稚童倚門望子歸未歸憂忡忡東臯無良  
田何以待歲豐盛年將稱意無為學轉蓬

送方永叔往教重慶

汲水得明月倒影上青天客行三十年未識蜀月圓中  
宵夢巴蜀秣馬辭燕服成都雖云遠未到意已足遠意  
不可期宿夕宛見之雲迷飛鳥道雨急卧龍祠干戈何  
草草祇說渝州好但得渝州官甘就渝州老渝州古雄  
城彭君舊建旌至今江石上猶有故時名豪傑久已矣  
空城俯流水復有江東人來教渝州士方侯天機深大  
雅托遺音沈潛萬夫敵脫略五湖心翩然別我往長挹  
仙人掌疾風吹大旗落日明斜舫即此少相知相知無  
限思巫山桂樹發折寄定何時

題鄱陽程景伊有筠樓

陳子山 名相仁

飛宇出霄漢脩筠與之齊蒼然塚曲闌宛若在林棲其  
上富文史高明還日躋方期下彩鳳自可降青藜

秋懷寄二弟并示諸子姪 余小谷 名茂舒

明發不能寐開軒坐南榮悲風何方來山木策策鳴少  
壯漫不省病身最先驚憂端那可遏短歌聊據情  
空山四無人疇與共秋懷有弟各一方抱病只自哀寫  
之寄子姪根本願深培肯不忽吾言吾死心亦灰  
四十學無聞但有病日增嘔泄及一載藥鼎空煎烹泉  
竭不自中安能復又生看彼青青木秋至還凋零  
近世西山翁讀書甲乙記希聖與作相垂憲亦云備奈  
何天地閒人苦不立志秋曉卷書坐撫几發長喟

寄題嘉興王彥良教諭春波漁者 夏伯成 名

子家雙湖上羊裘卧煙雪昕夕一虛舟釣雲還釣月時

發款乃聲隔浦桃花樹花外錦鴛鴦齊飛鏡中度題詩  
向孤嶼把酒對芳臯晒蓑臨晚照鼓柁亂輕濤雙湖興  
自佳微官滯歸迹每望吳山雲思弄雙湖色黃鳥音初  
淑白魚春又肥還將錦溪棹送子雙湖歸

送別李伯寔五首

胡伯文

情通萬里親遠別恐遼絕裴回言笑閒眷愛終糾結以  
鏡投月中相照一何切上下雲與塵輝光豈淪滅  
我有五色絲投子錦綉機前織鴛鴦紋後織連理枝一  
疋裁為雙卷懷各置之千歲兩端合永無焚所治  
梧桐在高岡上結朱鳳巢大雛刷毛羽小雛亦飄颻朝  
陽蔽浮雲衆鳥暫咬交翱翔覽德輝企何為動搖  
十五結交初大學同詩書纏繇二十載雙雙水中魚君  
髮今已斑而我白髭須同門半為鬼成材者誰歎我心

永如帶周匝繫君裾

司馬文如錦所少者黃金金多反致怨文為治世音昔  
病今已愈書草復盈襟文園倘見招為我恣歌吟

偶成二首

余叔容

名聞

永日不可暮長夜何時旦自昔未遇人撫景每興歎寒  
暑各有常無乃重憂患獨於羈旅中此語若可玩杜陵  
厄窮途寧戚登顯宦用舍信所逢苦志終勿換勗哉勤  
進脩長途無畫半

昊天行日月秋序倏云杪颯颯寒夜聲涼風動林篠反  
側不成眠攬衣待天曉云何百年閒多被世累擾理順  
事不違心定物自小悠然得真趣言盡意難表

病起

方德昭

名晉明

人生百年閒往往如過客吾生未六十須髮早已白自



持歲寒心謬比松與栢衛生之良藥疾病自侵迫天運  
苟未窮流年豈終厄依然冰雪姿蒼蒼見顏色

衢江舟中懷江實夫

仰止爛柯山故人渺何許行舟不可臆回首重延佇涼  
風吹客衣秋樹濕殘雨多情雙鷺鷺翩翩向洲渚

送孫彥周赴南雄路同知二首

黃誠父名真

人華

翩翩朝陽鳳濯濯青桐枝文采燁神化禎祥應未期天  
風動地起百鳥不得追豈不念桑梓昭代須羽儀  
瀛洲種瑤草清芬結紫雲搖曳燕寢月駘蕩薇垣春世  
人惑蕭艾總總方避塵願言足雨露流芳遍無垠  
觸暑越大嶺豈榮車屏星涉江采夫容聊寄遠別情南  
州得冰雪瘴霧行以清合并將何時秋風海樹青

山中晏起

葉仲輿名衡

朝日上高松山人卧未起柴門自反關黃葉滿山地念  
昔束冠帶待漏夜忘寐鄰雞始喔嗉崖顛倒著衣履上馬  
常恐遲余髮不暇理嚴霜曉漫漫容鬢日凋悴從朝忽  
達莫役役不知止幸茲遂閒退庶以恬四體晨興無餘  
事灌圃引流水所願蔬菜長聊足樂暮齒長歌頌聖明  
林下望天陞

齋居雜興

董鑑翁名自明

天地始一氣清濁相網緼尊卑一以陳品彙如區分三  
光西北流萬派東南奔恢然有象外往聖置勿論誰云  
四大地須彌為之根厖言惑群愚愒况非所聞  
宣尼述古典斷自陶唐篇鴻濛不足徵開闢知何年况  
乃秦火餘敗壁收殘編不存卜筮書庖曦亦無傳嗟嗟

三季後喙喙紛蛙蟬雲和靡遺韻懷古心悠然

山雲起膚寸斯須盈八區湯湯百川流不足供尾閭於  
焉寓至理天地吾其軀歛藏妙無朕著見斯有餘欽惟  
聖賢心千載同一符

文籍古未作人心有全經風俗自淳厚乾坤亦清寧後  
人蓄萬卷垂白猶單精辭華絢畫錦行詎逾春冰網常  
遂淪黜寵利紛趨營滔滔誰復易泯泯吾何徵緬惟鄒  
魯傳允矣昭儀刑

擬古四首 汪真率 名角

行行重行行天下有正途但能審所由不畏岐路殊古  
來堯桀分祗在疾與徐小人務巧捷顛躓非所虞君子  
寧有死徑實不忍趨平平皇極路慎勿以為迂膏車秣  
吾馬逝將達天衢

涉江采芙蓉登山拾瑤草瑤草不可期芙蓉秋已老歸  
來北窓下燕坐據梧槁乃於靈府閒欣然得吾寶神工  
謝琢磨妙質自妍好承以白玉盤藉以五色繖向來逐  
芳華恣力窮探討悟賞自有真默識貴不早

客從遠方來千里復萬里道途苦不送四海同一軌高  
冠何巍巍長佩亦纚纚虛懷出羲皇清標映園綺問客  
來何為相從采蘭芷豈無梁肉味所性不在彼飢食首  
陽薇渴飲箕山水

孟冬寒氣至天地日以肅芸芸萬木歸窈窕群動伏如  
何遠行客中道悲黃鵠良田既已荒嘉種何由熟朱顏  
忽蹉跎日月如轉轂誰言故鄉遠回首在吾目歸來歸  
去來及此不遠復

海鷗 胡汝為 號桂林

皎皎雙白鷗海上老歲月人將加網羅有無尚恍惚息影不自深驚波起飄忽風雨蔽空來不知飛復沒

和太守亢思忠括蒼四景 江彥章 名文顯

古寺春陰

林關結春陰廓宇清晝靜東風吹不開禪窓疑欲瞑林深禽自語雲密塔藏影佛地尚混沌未判鴻濛景

巖泉曉月

亭亭巖上山皎皎泉底月泉流月不動光彩結奇絕五更淨無雲穹壤共澄徹日氣廓清明郊原浸霜雪

紫虛秋風

巍巍神仙宮只在雲深處清風從西來白雲忽飛去珊瑚響珮環策策鳴高樹上有步虛人飄飄駕鸞馭

西山晴雪

積雪擁西山山色恁非昨晴日烘不開萬疊聳寒玉巖崖昭回光玉龍蟠古木還宜拄頰看霽景眩吟目

雜詩 吳楚望 名章

白日向西馳黃河復東注四時迭推遷忽忽歲云暮疑霜凋百卉摧我庭前樹榮華易憔悴零落在蹊路人生只如寄不啻草上露世短心甚長俛仰多變故胡為勞其形役役自馳驚臨風發浩歎耿耿應獨悟安得肌膚輕飄飄舉飛步倒景凌三晨坐閱光陰度

題松雪軒詩卷 趙德元 名元善 號拙齋

蒼松出幽壑將知化為龍飛騰固有時竟日雲相從下有柯山仙盤桓軒之中閑來種瑤草環珮聲丁東敲詩步明月跨鶴乘天風玩彼名利人何當謝樊籠  
過東流縣有懷先子登第後筮仕於此竟不及

祿舟中瞻望用致追慕之情 汪叔達 名仁立  
泛舟過東流感慨傷中情風雲不早會遲暮將何成富  
貴等浮漚未用櫻吾寧時來即可為亦非人力能保此  
清白傳常恐忝所生孔孟日杲杲大道中天行勉焉繼  
先志庶以善自名

東山對月

雲歸東山去月出東山來雲月互吞吐天容尚煤炁長  
風萬里至雲翳如崩摧月輪升以高宇宙無纖埃坐久  
塵慮息悠然好懷開娟娟照床帷露冷霜信催人閒光  
霽少欲眠更徘徊

客舍懷余成季

夕陽在青山山高夕陰早美人未歸來山外碧雲好稚  
子候門前酒熟黃花老

感興寄楊存仁

李仲美 名湘

急景疾若流歲月忽已老春紅散餘花秋綠罷衰草薄  
帷思遠人遊子涉長道嘉遇難再期榮名徒自保慎言  
金石交快意窮幽討目斷蓬萊宮雲濤空浩浩

竹雲軒

程子正

名養全號正庵又號白粥道人

淇澳無東周渭川非故侯高懷得妙領殖此清陰稠清  
陰翳如雲清賞何優游頻聞鳳鸞栖每為琴書留長安  
車馬塵悵望良包羞明當策批榔與爾相綢繆

餘干烏知州德政詩卷四首

胡彥良

名公留

刪後已無詩况乃魏晉下寧無麥秀歌古意尚風雅采  
詩登廟堂托興自原野爰有公論好正在興起者  
扁舟過干越春盡聞啼鶻城頭桑柘陰農事方在田夜  
深更點明比屋弦歌連於茲二三事可見君侯賢

聽訟固不易未若無訟難發奸得神妙不受耳目謾明  
明古人意所貴求其端願言勗明德坐見民俗安  
昔賢講學地猶有遺址存百年未興廢寧聞薄俗敦  
弈作隘宮兢兢薦蘋繁斯文天未喪諸子其弗諼

時興

甘思學

名勉

交友以義合奚啻骨肉親千里有同心况我居比鄰昔  
有膠與漆今為參與辰悵然內傷心古道日已蕪淇澳  
貴切磋谷風悼棄淪命也何足云天性其自敦

子牙垂釣圖

白頭把釣竿所志應在魚魚腹藏素書得之登王車  
牝晨乞類運姬轍開一初我觀千載圖始信漁非漁

寄柯元德

遠客寄相思歲久字不減問客何所為東海弄明月觀

面生輝光道阻信難越空有千限情何由慰飢渴

論內

揚煥然

名煥奉天人

狀元

入

天地具此身胚胎乃潛受甚者感異類焉敢計妍醜冠  
蓋傳百世萬求一胃所以孟軻氏立言痛無後飄零  
風塵際拚作窮獨叟四年四懸弧吉兆自申西顧我果  
何人報施嗟已厚今冬復爾耳喜在得分剖女亦吾所  
出胡為生可否天下盡男子無姑卒無婦伏羲畫八卦  
錯綜定奇偶阿駒才五歲見客謹拜叩稍稍愛紙筆門  
戶知可守女生願有家教之奉箕帚乘龍非所期隨分  
逐雞狗

東園有桃李

吳維申

東園有桃李倚日如娉婷春風一吹拂過眼成青青  
青不可恃行復秋已零誰能觀無始坐此累有形俯仰

百年內死生俱未停

大明宮早朝

胡士則

名寬

蓬萊拂曙色燁煜舒祥光九儀肅清蹕日月開旂常聖  
人握金鏡繡衮臨玉堂咸英備雅奏圭璧輯群方歡燕  
洽湛露敷恩矣龍章謳歌罄率土豈樂逢時康興文極  
漢績聲烈照前王巍巍續鴻緒萬年斯無疆

止言

趙半閒

蘇張舌如戟危人亦危身期期周御史千載稱直臣清  
談每敗事諧謔良損神田翁有斗酒招我聚比鄰所言  
惟桑麻語語不失真

過桐廬漏港灘示舟人

鮮于伯機

名樞

驚流激長灘百折怒未已篙師與水爭退尺進纔咫技  
窮解衣下力耕過乃止維時春冬交冰雪寒墮指我時

卧舟中起視潁有泚迂疎一何補辛苦愧舟子

徐州懷古

吳幼清

名澄臨川人號草廬

籍也楚世將江東八千兵儻脆肌骨上國足橫行乘  
憤西入秦畫錦歸彭城嗚嗚千人廢諸侯莫敢爭竟坐  
勇力亡漢以寬仁興

感寓三首

滕玉霄

名賓睢陽人江西儒學提舉

吾愛李太白玩世如游龍自知天上謫何必人閒容海  
風吹綠髮蕭蕭卧雲松我昔夢見之遺以金芙蓉清輝  
恍在眼月落蛾眉峯

春風如綠波淡蕩洛陽柳高樓語錦瑟落花泛綠酒何  
人白鼻騮蒙茸紫貂袖一字或未識銀菟懸兩肘煌煌  
貝宮珠迺落緯肅手爰居偶鍾鼓犧牛竟文繡終然同  
一盡豈復論好醜誰知草玄者窮巷閉白首

舡頭書十乘舡尾酒百壺酒盡書在眼落月如明珠忽  
悟八陣法縱橫如河圖惜哉經世士未有窺唐虞季子  
相六國所見惟陰符

次韻元復初春思二首

袁伯長

名楠號清密四明人參知

政事

凍樹回青陽羈禽競新哢宣人語浮稍稍春事動澄  
心絕芳華小睡足幽夢夢覺天宇新朝光集飛棟  
遠客芳草思湛湛天外舟坐令親知疏低徊此淹留古  
樹擢竒石清流匯芳洲素心諒有在胡不為茲游

送邵元道二首

仲連匡世姿揮手却秦軍掩袂停白日登車抗浮雲射  
書誠草草孤城死生分辭榮敦厚俗矯抗離其群  
襄陽孟浩然拂衣歸故山放浪巖壑深流泳遺人閒舉

袖林花落擊楫江鷗還羊公何墮淚水聲日潺潺

送墜善之提舉江漕三首

盧彥威

名旦汝郡人翰林侍

春秋嚴筆削凜若執玄鉞君獨遺經結髮袍剗刷明  
剖是非心微探義理窟下視群兒愚爭端王正月竭來  
奮直筆浩然心思竭王切與帝德昭昭日月揭胡為厭  
詞林擬欲觀溟渤榮華若浮煙汗簡青不滅  
賜谷上寒日影射扶桑枝瞬息及中天流光迅難持人  
生百年內昂昂何所施孤鷗東南征浮雲西北馳可憐  
萬感身會合須臾期安得弄明月皎皎遠憂疑折花笑  
蓉浦蕩槳江潢涯優游以卒歲身名良不隳

我留君勿思君歸我當憶十年膠在漆一旦各異域吳  
江激微波震澤起暝色鷗鵬隔天地鴈鷺雜南北念我

平生友愴恨推胃臆獨看燕山雲歲暮日初具永言長  
風翺情寄南飛翼

錢祝直清

張伯遠

名立仁  
號楚間

朝餐狙林椽夕飲虎窟泉幽棲豈不逸於道為未全是  
以少微星含輝麗中天雲蘿謝招隱冠帶趨興賢魯生  
贊制作商老安疑然董子述徵驗賈誼明經權盛德有  
遭逢志士無棄捐長貧若忘世一出垂千年折梅楚山  
阿賦詩江水邊寂莫思古人中懷為君宣

雪軒

楊仲弘

名載浦城人  
宣城推官

北風海上来大雪何壯哉上下九萬里洗淨無纖埃君  
家十二樓軒窓洞然開吹笙擊鳴鼓呼賓與銜盃名言  
落四座大笑聲如雷舉頭望長空高興驚冥鴻仙人五  
六輩飛下白雲峯粲粲明珠袍相從萬王童問君何所

事未就丹鼎切翩然却携手共入蓬萊宮

題文丞相畫梅堂

大廈就傾覆難以一木支惟公抱忠義挺然出天姿死  
既得所處自顧乃不疑惻愴入江南名與日月垂我行  
見遺墨再拜墮涕洟名堂有深意亦惟歲寒枝可知平  
昔心慷慨非一時峩峩著棟宇昭昭示民彝勿使風雨  
敗永慰千古思

太古雪為楊友直賦

往時天大風能吹華山裂墜此一拳石咸云太古雪粵  
自開闢初雲氣所凝結已經六萬歲變化同叢業望之  
色正白表裏共澄澈塵土不能浣光彩耀日月願君勿  
愛此持以獻金闕回中避暑時持用消毒熱

東山詩為葉子實賦



東山高幾許上有浮空雲葉君居其間好道夙所聞窮  
年絕人事斲坐攷遺文松關晝長掩石田朝自耘葆真  
去汨昏養息襲氤氲軒冕有遺榮高舉謝世紛悠悠阻  
林莽長與麋鹿群由來巢許臣不事堯舜君

贈淳真子

揭曼碩

名傑斯豫章  
集賢學士

蕩蕩白玉京超超淳真子十二求神仙服事立與李嵩  
洛二十載結茅白雲裏食是賜谷霞飲是玉池水鬼神  
真能識百念吹不起一朝忽騰化逕去不可遮飛駟服  
五龍角巾搖三花朝發扶桑國暮宿河漢槎朝食千歲  
桃暮食五色瓜長揖青牛君高歌度流沙還憩金張邸  
謂笑許史家日食五侯鯖安能歌胡麻春風長安陌曉  
日邯鄲道迎人上青天送人入秋草竦身入八極天地  
忽亦老寄謝區中人全身以為瑤

送虞德脩

管仲相齊國九合開基圖拔才筦庫中乃至七十餘虞  
君丞相後况復聖明朝青年賢才諳白髮沈下僚下僚  
不敢辭王事不敢遲五月日如火獻賦來京師有弟若  
班馬出入承明下天子親重之今無古猶寡乾坤再開  
闢乃得會音形夜語恒達旦歡意既平生朔風塞上來  
長橋綠如洗浮雲盡南征吾行何由止弟當奉明主一  
心致貢禹相送東郭門翩然隔燕楚

雜詩三首

東風吹百草公路一時生  
繇桃與艷杏遍野復盈城  
東鄰宰肥牛西里按新聲  
孰不乘時節為樂快心平  
明出南郭登高望帝京  
大哉山河固喟然獨撫膺  
社日玄鳥至入我高堂飛  
舊巢幸未坼新泥復相依  
豈

徒安爾軀復欲養其兒對語嬌且閑上下遞差池勿因  
秋風起相逐忽還歸  
青青孤生松高出浮雲中下無嘉樹林上有萬里風俯  
視原上草秀色何丰茸自顧豈不高獨立難為容常恐  
本根蠹委此蒿與蓬

過江州

遙瞻九江樹已踏西江土落日照庾樓驚風滿湓浦寒  
鷗迎棹起遠岫依城吐悵然感羈遊澹爾成賓主白頭  
釣魚叟赤足浣紗女未識居者歡安知行者苦

寄彭通復二首

區區九州內橫縱四千里誰設山與河愚者分表裏京  
師天下本萬國赴如水珠犀從南來狗馬從西止浩浩  
荊吳船日夜行已至生材無定所一物孰非已皇天仁

且廣君道亦如此我思古成康當日誰共理  
巢由伏箕穎園綺居商顏洗耳甘自絮茹芝竟不還三  
傑足為理五臣安可攀高尚誠所貴孔轍奚獨環吾聞  
有隱淪多在衡霍閒飯牛腹長飢百結淒以寒懷寶羞  
自獻邈然老空山

自盱之臨川曉發

扁舟催早發隔浦遙相語雨色暗連山江波亂如霧初  
辭梁安峽稍見石門樹杳杳一聲鍾如朝復如暮

送人歸豫章

積雨霽俱夏故人今日歸手持毛生繳身著萊公衣王  
樹掛秋月丹萸揚曉輝東湖徐孺子應怪父相違

秋夜作

露下氣逾蕭月高寒欲流落葉階前樹疎鐘城北樓衰

年對急景歸心臨暮秋當世非無意才薄徒淹留

贈王郎

王郎楚狂士意氣飛秋霜讀書破萬卷下筆數千行富  
貴視浮雲况肯矜文章十五恥閭里掉臂辭故鄉夜宿  
東海月朝買西州航瞋目王公前結客少年場一飲或  
一石一醉或一觴寧揖屠狗人不與俗士當千金不易  
笑歲暮單衣裳阮籍在窮途英聲連四方鸞鵠有時鍛  
反愧燕雀翔世無劇孟交不及青樓倡燕趙如花人翠  
袂黃金璫不識豪俊士空媚癡與狂王郎遠過我坐我  
枯藜床終夕無酒飲撫髀歌慨慷平明別我去極目空  
茫茫

送李子威代祀嵩衡淮海

黃子肅

群生望甘澤五岳雲氣通天香落巖谷瑞靄春冥濛海

潮天際來金碧森萬峯劃落紫翠堆亭亭玉芙蓉古廟  
絲竹存迎神奏黃鍾空山遞餘響落花舞青童

古詩送王君冕歸陝西

狂風卷茅屋遙見溪上山人生有遇合離別何足歎黃  
鵠將西歸臨水振羽翰我有雙明珠置之青雲端朝朝  
復暮暮照君千里還

訪子威都事不遇

清曉抱綠綺來就夫君彈夫君久已出野水流花間石  
澗渡微雨秋生湖上山松陰坐永日心與雲俱閑人事  
有離合白鷗聊共還

送楊信父歸臨江

自別武夷君海水落幾丈當年尊俎地顛倒疊橫嶂君  
從山中來應見桃花開秦人笑相語愧我非仙才茫茫

八極中雲月秋徘徊苦吟不出門孤負黃金鑿劃然西  
風生拂我琴邊埃願從雙白鶴去去不復回

山行二首

愛山不知倦緩步成幽尋觀泉度疊嶂携日穿層林  
彼枝上鳥少憇松間陰蕭然清風來發我松下琴白雲  
邀我飲流泉未我吟曾謂城中人不知君子心

采采巖下菊菊老花壓地泉露飄我衣擷英不盈袂  
錚然松子落林下遠風至沈吟不成詩支筇領山意

番禺舟中聞友人消息因贈

岩嶢九天門玉署青瑣闥老我煙霞心參商坐寥闊十  
年望春雲不忍鑷白髮鴻鴈遠塞來頻頻附書札江湖  
秋水淺舟楫苦不達不知南山陽梅花為誰發

武夷道中

積雨多浮雲百川合為一新晴落花深草徑沒行迹溪  
風淡和柔天宇浩澄碧諸峯出雲閒淨若露初拭遲遲  
策駑馬稍稍度翠碧從人不知疲佳境恣所歷松閒古  
仙人燕坐巖下石羽化今幾年蒼苔滿雙屐乾坤妙無  
言小大自有得為我謝群芳春風各努力

送牟伯厚還警

薛宗海

名漢永嘉人國子助教

西風起雙鴻渺渺度萬山空林霜霰落各念飲啄難中  
途忽相失獨留諒無歡極目送冥飛風雲逸脩翰低回  
守矰網自顧形影單奮翅念遠舉天路浩漫漫空想五  
湖水春風漲波瀾

送馬少卿南祀

總章盛金德齋明赫當宁皇皇遣天使肅肅承聖語三  
熏禮岳瀆萬里涉梁楚祝釐歸堯舜降神出申南南斗

迎文星西風起儀羽樂章洞庭月旆濕湘岸雨壯吟鄙  
騷怨高談洗儒腐過家猿鶴喜攬轡鴻鴈聚青闈閔賢  
勞黃屋深記注歸騎慎勿徐席虛玉堂署

送曹學士草詔畢還大都

白轂始巡幸風伯前汛掃宸衷自警畏廷論各至到藩  
飾資舊臣優渥發新號四方聽綸綍千載仰訓誥言歸  
玉堂署送別龍庭道戀闕信馬行及門聞鵲噪

和虞先生上京夏涼韻

登臺羨皆春覆盆慘長夜誰能均苦樂世道勤汛洒灑  
京逼穹昊重續度朱夏下方正喘汗歎赫在爐冶南北  
各異宜敢訝行化者倦游念茗霽漁竿自堪把

書墨竹

當年文湖州愛竹骨已朽祗今高李筆可繼湖州後何

人裂霜紈寫此三五葉想見翠琅玕蕭然挺清節

和虞先生筍香

竒芬擣精微纖莖挺脩直池輕雪消皖火細螢耀夕素  
煙裊雙縷暗馥生半室鼻觀靜裏叅心原坐來息有客  
臭味同相看終永日

題水仙圖

韓明善名性會稽人

洛下風流人人言影亦好况乃蛟宮仙迥立清漢表翠  
裙濕涼蟾晴光白如掃坐對冰雪容不受東風老澄江  
眇予懷相期拾瑤草

釣臺晚泊

黃晉卿

四山環一水遺臺故嶺岼那無漁樵居政復不敢安舍  
舟衝微雨憑軒俯清灣恨昔乘興舟無從寄游觀今我  
有行役乃爾容躋攀英靈豈念我為解塵土顏落日奠

蘋藻清風聞佩環南尋謝翺墓林暝吾當還却去望岑  
碧孤舟生晚寒

鐘山

平陸漫千里茲山乃穹然猶怜布金地未即辭喧闐巖  
液散珠琲春岡走蜿蜒稍欣涉幽趣登頓衣屢褰路細  
石嶕嶢厓深竹娟娟洞扉剝開敞峻峯指中天冥探歷  
欽峯垂蘿弱容牽碧潭隱光怪華雨標崇筵下睨飛鳥  
背茫茫但蒼煙眇默玄圃凄凉雲嶠篇休駕將未能  
惆悵春風前

贈別葉審言

昔人稱好士乃有黃金臺黃金亦何物顧用驕賢材葉  
君被短褐志力何雄裁北走叫閭闔紅雲指崔嵬終焉  
無苟售自保同嬰孩車服非吾榮黃金直浮埃十年今  
何官茅屋歌蒼苔豈無琅玕樹鳳飛故低徊一朝脫身  
去欵觀雲路開葉君善自愛往矣無嫌猜迷邦古所誚  
豈弟貴不回願言吐竒胷落落排風雷尚念窮賤者衡  
門守蓬萊

送友人赴盧陽教諭

播非人所居潭陽實其鄰荒淫雜巫鬼哀怨餘騷臣念  
子有行役水陸彌數旬乃知臯比座佇承文翰賓遐徼  
指天末男邦控城闈俎豆當在列冠裳定來臻足明理  
化盛演溢周窮垠廣陌望八方出車日麟麟蠻荆孰無  
適忠信惟書紳簡書有程期取別無逡巡揚鑣觸炎熱  
振鐸驚遠人沅水春蕩潏楚山暮嶙峋行行慎其度離  
別非苦辛

效古二首

上山見明月下山月相隨月豈知我愛我行自見之故  
山日以遠故人不可思殷勤謝明月願爾無時虧  
女羨眾所悅士窮世所輕輕重安足言泥盡水自清淮  
陰初寄食曲膝膝下行李子黃金多妻嫂來相迎自古  
已復然嘆息空吞聲

述懷二首

陳眾仲

雨過中夜涼殘月在林麓有懷不能寐起步松徑曲百  
川日東注何以洗流俗長河在天上手短不可掬  
漢法賈人賤衣服禁繡綺當時販繒輩赤鞞亦紫紫項  
羽圍滎陽漢帝脫九死云何戶牖公持此以為市平世  
多人才倉卒誰可倚我思魯仲連仲連天下士

經采石

傅汝礪

未明發蕪湖終飯次采石大江天同瀉巨浪山與敵松

寒蒼虬姿崖古老鐵色其傍有仙塚云是李太白生為  
長庚精歿為大塊迹因思開元中出入蒙帝澤御羹白  
瑞杯宮研青玉滴恩榮日深重意氣何赫奕酣歌太華  
小豪飯渤澥窄頗聞宮中怒遂有天上謫殷亂微子行  
楚昏屈原斥嗟哉唐家帝同姓逝安適何年為茲遊千  
載但故迹騎鯨信縹緲捉月詎昏惑得非厭塵羈無乃  
違寄客翻然委之去富貴何足惜杜陵平生友夢寐頻  
見憶白骨焉所求青山亦岑寂相去嗟已遠令人心悲  
塞舉杯欲酬之帆去招不得

清露軒

秋氣集太虛夕光溥高樹時聞陰液墜暗識商飈度旒  
旒星動林英英月霏霧涼扁息塵想幽琴寄玄晤寂歷  
松上聲逍遙丘中趣釣天澹斜景銀河曖微素古詭今

所希大音誰能喻仙人飲沆瀣壽僉金石固千歲不可期空歌徒延慕

雜詩二首

植蘭彌九畹種菊被三徑幽芳固殊姿馨香良可並  
蘭以為美食菊以資命賸言理蕪穢恒使枝葉靜蕪穢  
苦易侵枝葉苦不盛豈無桃與李貴此諧野性  
窮巷有畸人夙夜勤古道弊衣適至骨疏食恒不飽歌  
聲若金石顏色終歲好豈無當世念所趨惡佻巧美玉  
不足珍懷義以為寶

賦得金鍾送宋顯夫僉事之山南 劉文廷

安城人國子助教

蒼茫楚澤秋巖谷隱宮徵魚龍守軒轅  
獵鳥識追蠹酒醒江南客月在船窓裏佳期不可尋相思滿湖水

題述律萬戶澹樂軒

張仲舉 名翥號蛺蝶菴晉寧人翰林承旨

惟澹有至樂此樂世罕知誰能味無味捨彼甘與肥君  
侯文武才面有虎豹姿被甲起上馬出入百萬師西來  
樹功勲獻頌白玉墀方行大將權繞帳羅旌麾紛華艷  
人目孰不為朶頤顧於方寸閒物累乃若遺齋居寄遐  
賞而與山林期處樂寧易言豈獨靜者宜始知豪傑士  
自有絕世資悠哉澹中趣吾道同所歸

瑤林臺為薛玄卿賦

甘允從

西山有崇臺上與雲氣通仙人紫霞佩導以雙青童逍  
遙琪樹林磐礴瑤華宮積石象玄圃連岑構空同纒纒  
駐朝景冷冷度天風丹鳳刷儀羽絳節飄瞳矐矯首不  
可及滅沒凌飛鴻願言授靈藥與世無終窮

晚出西掖同柯博士賦



薄暮出重闈，逶遲望雙闕。輦路猶輕塵，上林已初月。悠悠文書靜，去去車馬絕。小草慙長松，承恩慙無別。

雲松樓

余廷心

初日高樓上，卷漫對黃山。黃山出霄漢，爛熳發青蓮。參差非一狀，朝夕看屢妍。九華承雙鳥，敬亭附駢筵。漫漫雲幕嶺，沈沈松覆泉。清焱坐中起，如聞帝女絃。靜有幽事樂，動無塵慮牽。消搖悅心目，茲道可長年。

八月十五日處州分司對月

玄武夕始正，華月升秋旻。金波何穆穆，綠桂滿中輪。徘徊出西陸，照耀此甌閩。光流河宿隱，氣隨商律振。餘輝洞軒房，紫蘭含微津。皇天降嘉歲，五政亦已陳。樂哉一卮酒，允矣同庶人。

龍虎臺

周伯溫

名伯琦號雪坡齋易人江浦左丞

巍巍百尺臺，蕩蕩昌平原。隆隆鎮天府，奕奕環星垣。居庸亘北紀，隩區歛全燕。蒼龍左蟠拏，白虎右踞尊。斯名豈易得，天以遺吾元。明明傳正統，聖子及神孫。巡歸遂駐蹕，衣冠照乾坤。山川皆改容，草木亦被恩。章華民力竭，柏梁侈心存。豈若因自然，張設一旦昏。雄偉國勢重，簡儉邦本敦。年年舉盛典，宮中奏雲門。

擬古三首

徐天逸

皎皎機上絲，織為游子衣。游子蕩風塵，素衣化成緇。風塵不可避，四顧將何之。豈不念潔白，徒重墨子悲。勗哉加澣濯，河水清且漪。

娉婷閨中女，天質知自愛。空懷蘋藻心，日月苦行邁。蹇脩意良勤，遲遲如有待。未嫁庸何傷，失身將重悔。婉婉自結髮，伉儷情義深。夫征日已久，魚鴈成銷沈。自

伶鏡中貌衰白將駸駸有衣誰為熏有花誰為簪顧影  
雖無倚素心猶斷金青天懸明月照影不照心

詠塵 吳彥輝 名炳

氛氲隨騎集散漫依風度似霧暗津樓連雲隱郊樹漸  
迷烏几色已失京衣素嗟予南北人長年事行路

聽袁子方彈琴 倪元鎮 名璜 毗陵人

蕙悵凝夕清高堂流月明芳琴發綺席列坐散煩纓迴  
翔別鶴意縹緲孤鸞鳴一寫冰霜操掩抑寄餘情

送李徵士過荊谿訪王司丞

何處尋狂客故人王子猷花落庭前樹風吹溪上舟紫  
筍生春雨綠蘋滿芳洲心隨酒船發悵望不能休

題馬元德知州華山春曉圖 楊西亭 江浙貢士

三峯列金精層崖麗璇霄地高萬靈會日出諸山朝松

陰停鶴馭花閒聞鳳簫獨尋希夷叟相與談逍遙

商婦怨 陳子上 名高 永嘉人 秘書監丞

嫁夫嫁商賈重利不重恩三年南海去寄信無回音妾  
身為婦人不敢出閨門縫衣待君返請君看淚痕

歌風臺 楊仲如 名世 鄆人

怒濤突千騎上有崢嶸臺六合一望閒萬里天風來疇  
昔龍虎氣芒碭深雲堆煌煌赤幟立赫赫炎運開皇靈

固有厲亞父徒驚唉得志家海內故鄉重徘徊寤寐猛  
士守宿將胡嫌猜矧茲霸心存咄彼後乘駘郎詠三侯

章擊節嗟雄哉

汪大雅善隸書詩以贈之 揭伯防 名法 豫章人 秘書監丞

漢隸變秦石中郎實云祖渾渾元氣運生意蓄未吐鍾

梁已小變唐遂失其武迨元敷公起精妙可追古鳳翥  
與鸞翔爛然照中土老成既凋謝來者或未覩紛紛欲  
爭高往往背前矩峭刻少渾成癡肥乏筋胥收斂類畏  
縮軒張或傷怒規規事模倣又若優孟舞汪君忽傑立  
落筆祭爲主見此神骨全真若古鍾呂羨王出荆璞明  
珠還合浦况當文物新制作方並舉紀常勒鐘鼎封岱  
禪梁甫大書與特書執筆當俟子具茲華國文名已登  
天府

題荷花卷送李山甫

孫居仁

名庚號雪  
巖慈然人

涉江采芙蓉江長浩煙霧搖蕩木蘭舟依稀認前路粉  
花委秋風翠實待寒露徘徊水中坻佳期未云暮歸來  
明月多擢歌起鴛鴦

新春喜晴

吳敬庭

歲序更五日人皆悅春晴官曹喜休暇瘦馬成郊行冰  
消明水綠霧散山光明寒梅送餘香幽禽弄秋聲覽物  
俱得時悠然起深情蹇余佐茲邑慙負吏隱名撫字心  
轉勞催科政何成願言兆豐年擊壤歌太平

秋懷

吳師道

江南木葉飛江北百草黃風煙澹莽蒼悵望川途長寒  
魚聚其群鴻鴈忽成行俛仰念時物索居耿淒涼昔我  
二三友敦好攻文章漂零轉相失尺素不得將人生四  
方志企爾揚聲光登山豈無車涉河亦有航真誠諒不  
隔離別庸何傷

有感寄崔左丞二首

胡梅畊

楚人不愛玉玉人不愛足此足寧可別此玉不可辱  
齊王不好瑟瑟人不好琴吾琴既不能吾瑟聊自娛

寄遠

周德可

邊風驚枕簟漢月耿房帷何處懷人切停梭見鴈時寒  
生衣莫寄瘦盡鏡先知願子長努力効忠歸未遲

感興

汪公濟

猛虎嘯荒嶺長蛟躍飛濤行人進水陸惴惴恐與遭杖  
劍吳江深挾矢南山高此誠一念烈彼亦無所逃居然  
就剝刺剝落鱗與毛桓桓丈夫志袖手非辭勞

春雨歎

汪復亨

天地生物心春雨澤尤溥陳麥發新苗草木競繁舞慨  
然念吾親青山一杯土逝水無回波慈容莫重覩依依  
菽水懼慘慘蓼莪苦九原渺長夜至痛負終古消息固  
有常恩愛豈伊阻杯圈口澤存授簡記音吐顯揚詎敢  
後萬一圖報補

和揭曼碩兼懷武昌名勝

楊信可

親友日以踈江漢日以深孤雲懷海嶠倦翮思長林終  
然念所知必流動悲吟豈無後日期邈若隔千岑安得  
好風來冷然入中襟日與親友會微言自規箴

宿赤城館

馬易之

休駕赤城館憑軒望前山飛雨西北來亂洒石壁間風  
寒樹槭槭木落沙班班牛羊盡歸村微燈掩松關野老  
頗留客及此農事閑傾筐出山果濁酒聊慰顏移尊對  
金閣靈宮鬱孱顏安得吹簫人乘鸞月中還

過池陽懷李白

陸天錫名都刺鴈門  
人聞憲知事

我思李太白有如雲中龍垂光紫皇案御筆生青紅群  
臣不敢視射日日盡盲脫靴手浣鞮蹴踏將軍雄沈香  
走白兔玉嫫失顏容春風不成雨殿閣懸妖虹長笑佛

紫紫手撚青芙蓉掛席千萬里遨遊大江東放舟玉鏡潭弄月秋浦中濯足五湖水掛巾九華峯羈懷正浩蕩行樂未及中白石齒爛爛貂裘淚濛濛神光走霹靂水底鞭雷公采石波浪惡青山雲霧重我有一斗酒和淚洒天風

寄遠

留若愚

名層

征夫往幽燕賤妾住吳越參商二十載綠鬢生華髮年年望飛鴻目斷愁不歇秋盡冬復春葉落花更發恨君顧妾身不如天上月月行幾萬里東出復西沒又東出夜光夜光頻照妾妾容謾比花君情遽如葉念欲走從君河廣詎可涉燕趙多美人顏色皎如雪所樂在新知誰復念離別雪性本飄蕩雪質易虧缺何如賤妾心不轉堅似鍊君看望夫石千載名不滅

洛陽陌

錢思復

名惟善

驅車洛陽陌周道何逶遲玉帛走侯甸金湯固城池潘令好桃李阮生多路岐銅駝卧荆棘索靖獨先知

擬古

留子輿

名堪

千金買明珠百寶裝帶鉤寶帶綰同心明珠垂兩頭美人結新歡託體相綢繆再拜稱主壽持巨奉千秋

送客洞庭西

楊廉夫

送客洞庭西雷堆青兩兩陳殿出空明吳城連蒼莽春隨湖色深風將潮聲長楊柳讀書堂夫容採菱漿懷人故未休望望欲成往

要離塚

金昌亭下路春草沒荒丘云是要離塚令人生古愁侏兒三尺榦不佩雙吳鉤中包猛士膽白日照高秋忍死

屠骨肉視身若蜉蝣  
荊軻不了恨慶忌成身謀如何  
噫客死與爾同仇

存與篇

東家萬金產西家百屋錢  
錮以鐵門限自比長城堅  
須臾一轉首後人不能傳  
却觀存與者非帑非聯  
阡巍然一高閣閱世而弗遷  
問君何能爾但指方寸田

新嫁娘

盧廷舉名昇高唐人

新婦調羹湯小姑綉衣裳  
新婦不停手小姑不下床  
新婦語小姑爾亦不自量  
爾年二八餘寧又阿母傍  
請看綉針底文彩雙鴛鴦  
春風一朝起持贈畫眉郎  
爾姑別我去如我事姑嫜

宇文子貞至驛為松江諸色田糧事賦古詩二

章贈

孫元實

朝行谷水東莫行谷水西  
谷水日日流驛舟日日来  
驛舟來不已波浪日日起

朝行谷水西莫行谷水東  
傍人指驛舟舟中有春風  
春風吹谷水照見桃與李

生日自責三十韻

張夢辰名樞

西有濯錦江東有自滾湯  
南有樹頭酒北有地種羊  
我生四維中曾無一線長  
仁獸乃騶虞瑞鳥為鳳凰  
帝江解音律火鳥識興亡  
老我嗜書史疊疊空文章  
聖德不援席賢知亦賣漿  
飯牛百里奚誣金同舍郎  
我何專一隅跬步費籌量  
緹紫小女子有策陳未央  
姬滿鬢鬢對言如珪璋  
退畊力不任進升心未遑  
我髮日種種我生日茫茫  
頽然六十翁宇宙須眉蒼  
一子峭孤立力穡不救荒  
三弟各奮飛食祿天一方  
今年耳重聽兩眼無

童光長笑却秦兵大哭救楚王少不同鸚薦老無事鷹  
揚今日屈初度妻子具壺觴坐我方惻然置身桃李傍  
肴核雜前陳旨酒弗願嘗聽我中心辭援琴彈慨慷父  
母生我時艱險且徬徨三日不蓐食俾整棺衣裳皇天  
與后土覆載德汪洋展墓渺何時望望白雲鄉惟有罔  
極思九死不足償妻兒悉我意嗒然推肝腸請從事斯  
語沒身不可忘

關山月

釋象原名仁

白楊風蕭蕭胡笳樓上發壯士不知還羞對關山月去  
年天山歸皎皎照白骨今年交河戍明明凋華髮交河  
水東流征戰無時歇斗酒皆楚歌歌罷淚成血

春夢軒

余士平

名詮撫  
州人

池青草色暖蝶曉花枝滿花滿復花稀春歸蝶亦歸蝶

歸春杳杳春夢何時曉推枕看東風幾人春夢中

舟中夜雨

蔣季和

名惠番  
易人

蕭蕭蓬上鳴默默蓬下聽聲催寒氣饒勢逐風力勁擁  
衾客未眠維楫江初瞑不似瀟湘時今人動高興

蛾眉亭

張志道

名以寧古田人  
翰林侍講學士

碧酒雙玉瓶獨酌蛾眉亭不見李太白但見三山青秋  
色淮上來蕭然滿雲汀安得五十絃彈與蛟龍聽

贈瑞雲林上人

錢伯全

名壁華  
亭人

英英谷口雲鬱鬱溪上林形影偶相值去留復何心握  
筆攬秋思倚窓延夕陰誰云市朝遠亦足慰幽尋

和友人過西郊韻

李象賢

名圭海  
寧人

秋原晚蕭曠杖藜荒逕微川迥眾漚集天清孤鶴歸寒  
煙蔓草密積雨豆苗稀臨流擬結構息鞅振塵衣

趙千里田家四季圖四首

釋西伯名萬金

桃花浪已深楊柳風猶弱鄰曲欣往來逢迎勸耕作健  
犢不自暇老農良有托共醉社日尊陶然得真樂  
蠶事方告成鳴蜩有新聲插秧雨初遍治草日不閒  
坐高樹陰解衣午風清作勞時自逸孰謂非常情  
湛湛露華白蕭蕭楓葉殷黃雲半已歛玉粒終不慳官  
賦戒早輸農家期暫閑酒熟互招飲只在鄰里閒  
欣逢大有年困積庶稍豐滌場已十月朋酒邀諸翁處  
處歌擊壤熙熙詠陶風兒孫自生長樂與堯民同

吳越兩山亭

周履道

兩山夾江水孤亭橫翠微吳雲與越鳥千古不停飛風  
厓洒松瀑月壑舞羅衣王氣未消歇霸圖今是非長歌  
一杯酒掃席延清暉

題萱花圖為賴善菴賦

蘇昌齡名大年

亭亭萱草花歲晚顏色好興言北堂陰樹之可怡老懷  
歸歸未能游子悲遠道披圖歌白雲天末蜚鴻杳

贈顏守仁

曹新民名睿

吾友夢谷生其人美如玉平生鐵石心剛介不可辱寧  
甘首陽貧寂寞在空谷懷哉能幾見高風激流俗

擬古四首次楊志行韻

孫履常名徽臨

涉江采芙蓉江水何澄鮮朱華映朝旭窈窕薰風前相  
望不盈咫風波良獨艱攬之置懷袖撫玩空長歎春榮  
衆所慕泯默無復言

孟冬寒氣至眇彼庭中樹忽得故人書中有相思句故  
人隔異縣相望良獨苦候虫鳴廣除落葉被衢路凄其  
對搖落登高詎能賦白髮生鏡中荏苒流年度故人歲



寒姿亦有濟勝具相期佩飛霞共飲金莖露

青青河畔草春至不復腓延緣被陂坂飽彼牛羊飢  
荊時序遷王孫終未歸西風一蕭瑟禁客空傷悲安知  
壯士心金石乃不移陰陽無停運垂柳生金絲烏鳴百  
花開迴首乃爾為丈夫貴自勗千載以為期

明月皎夜光出自河漢東眾星爛以繁牽牛正當中未  
懷乘槎人上與河源通遨遊徃從之杳杳將安窮至人  
凌倒影千載幸一逢願言攬其袂一洗塵埃空乘風遊  
汗漫歷歷天九重有志未能就憂心徒忡忡

贈劉禹玉

劉師魯名汾郿川人

劉郎方朔徒遊戲紫泥海千年華表非唯有寸心在向  
來浙河西雄辯吞虹蜺手携九節杖東入蓬萊栖我時  
探禹穴同看山陰雪千人萬人中恠子獨超越朝騎白

鼻駟暮逐油壁車得錢即付酒携妓顏如花踏翻豪俠  
窟醉狎山人家或嘲狂處士或謂報恩子從渠立名多  
詎識子奇偉一朝去鄉國北上爭吹噓家無十金產袖  
有萬言書所陳果何事為國非自計寧遭丞相嗔肯負  
丈夫志蹉跎十數秋甘與黃冠儔善藏倚天劍未暇摩  
斗牛幡然走山東隱迹隨壺公還尋岱宗去絕壑凌天  
風雞鳴上日觀眼亂扶桑紅窺臨事未已逸氣橫萬里  
行歌齊魯閒興為廬山起廬山秀可食怡此冰雪顏揮  
毫洒瀑布五老開雲關遠公拍手笑喜見遺民還乃知  
士不偶正可遊名山去年卧衡岳聊憇四海脚獸垂君  
平簾懶賣伯休藥却呼魏夫人共把流霞酌今年與山  
辭下走湘水湄臨風弔賈傅酌月招湘累文章本踈蕩  
強忍終技癢光怪不可收倏忽又千丈有時遇知音朗

詠山中吟復恐兒輩覺不得容山林茲辰忽聚首尉我  
別來又辛勤四十霜所獲竟何有却懷居東時勇以功  
名期焉知尚漂泊筋力供路歧舉杯置往念此去安所  
之南窺古雲陽更了山川奇山川固娛日慎勿過幽獨  
奈何白雲歌再送劉十六乾坤眇蒼茫迴首眷空谷我  
將秣其駒乃不受羈束願子無遐心歸我返初服  
望雲黃松瀑名可王號石翁  
日出五丈高白雲浩如海城郭在雲中山人在雲外望  
雲雲氣深入雲雲氣淺亦欲入深雲不知雲近遠  
感興  
群栖平沙鴈有警奴輒鳴鳴多謂奴妄哀嗷墮弓矰牲  
牲中林鹿以媒誘其群相呼入罟罟鹿死媒獨生骨肉  
不相信効忠况他人輕言託心腹賣友終不仁君子能

審交四海皆弟兄

晚憇澗北亭

楊季

我性喜消散東園時獨行高亭俯絕澗下有流泉聲秀  
木鬱繁陰朱華散微馨踟躕澹忘歸夕露霑我纓人生  
忽如寄何乃苦營營優游在空谷飲水有餘清

寓懷寄蔣希文四首

陳直方

風雅日淪棄鮑謝悅人久正味乖眾嗜誰具易牙口文  
繡同世願布帛已何有朱弦而疏越此瑟薦清廟  
古來文學士秉筆侔天工造化妙莫窺恍惚迷西東險  
易迨兩途臨岐果何從知幾惟哲人為我開愚蒙  
西窓不厭頻幾度風雨夕青燈照無眠疑義相與析每  
於方策中痛為和氏惜三則獻荆璞未遇真賞識天然  
希世寶珉砥豈同日韞積而藏諸善價終不失

朝來有爽氣悠然見停雲虛襟啓幽軒佇立延氤氳好  
風不東來俯仰空無垠何當乘變化上下從朝曛世事  
每相違將誰與同群

題趙德宣慰代友人償債卷 陳濟民 名思濟  
江西廉

人以利爲利利等丘山高能以義爲利利等輕鴻毛偉  
哉趙使君重義輕幣刀周急乃君子而况同氣交交游  
負宿債代償曾不勞錐刀抵死競紛紛笑兒曹義風久  
不作千載空寥寥佳聲足傳播復有御史謠予詩亦安  
用但讀金之貂尚願君侯心推之及蓬蒿又願君侯位  
鈞衡早持操躋民富壽域永永無逋逃

秋燈 周本心

繁華忽已飛殘書稍復整玉虫吐孤照茅齋夜初永青

熒洞古心寂寞弔寒影耿耿一室外人世皆夢境

下第南歸別俞伯貞 祝蕃遠 名蕃上饒人  
饒州教授

驅車出東門別酒忽在手去國古所悲况復失良友  
芄丘中麥鬱鬱道傍柳揮手從此辭煙雲黯回首

中原道上次歐陽齊汲韻 揭希韋

中原七郡地氣厚風還淳天分澗瀍水路入河洛春聖  
賢所經營繩準相均平六合昔有隔一觀恨無因懷哉  
此盛區理者皆先民曾經龍虎啖重爲狼羊貧大君幹  
元化細物涵深仁一士行其閒鞍馬猶逡巡解帶思古  
道題詩清路塵望迷黃河北欲度正愴神遺黎當道隅  
涕說青城濱青城不可說迴首傷天津

雙結峯 丘東野

溪上立亭亭千載不肯筭山花巧粧東戲弄山鳥啼昨

夜海風來一霎夢行雨煙雲迷西東欲望不知所

明鏡

彭元亮

名炳武夷人

明鏡倚脩筠撫擊自清絕明河夜無聲茅亭四檐月露  
寒雀夢醒山花落香雪白雲雖無心今宵倘怡悅持杯  
欲問之忘言楚天碧渺然思美人芙蓉似顏色乘鸞月  
明中青霞擁鸞翼苒苒別離時吹簫苦幽咽

冲冲

日月行天高日月行天深高深億萬古歛之一寸心冲  
冲坐盤石壁樹落秋子欲涉九疑山風吹白雲起玉壺  
滿清露可以沐九州縹緲桂林西霓裳歌未休

蘭在二首

蘭在在楚澤蘭在在楚山古人見心易今人見心難  
蘭在在幽谷行子在岐路蓼蟲居蓼中人生不知苦

渺然

明月照脩竹繁露驪龍珠風起青松枝白雲行太虛人  
心海一粟獨涵千古餘乾坤不敢先渺然萬化初安得  
挽銀河從今洗天樞

愧淺

漢宣在冲幼危食劒刃聞壯大履宸極罔知丙氏恩大  
夫在帝左侃侃不自言光武草昧時嚴陵相與友乾坤  
洗瘡痍文叔乃天子子陵被羊裘逃往釣江水兩公絕  
世賢愧死淺丈夫何敢擬高風尚不漂母如

無為人所憐

前有億萬年後有億萬年寓形此穹壤百歲指一彈古  
來多少人滅没已不聞草木與同腐可憐生世間獨有  
聖與賢明名長久存聖賢在世時小心常畏天終始履

周道沒身無過言所居至廣大靡物可與權萬乘不為  
秦一瓢亦自尊我當師聖賢無為人所憐

楚山

楚山琢青玉斗酒浮漢江叩舷歌明月慷慨過楚邦亡  
國非所郵歲門思老龐此心出萬物富貴焉可降卧龍  
拜床下高風古無雙

湖上觀春

湯子文

名炳龍  
號化村

閉門五日雨出門萬山春湖光忽見我搖蕩白髮新九  
節瘦筇枝一幅故葛巾桃花勿相笑聊復此紅塵有錢  
困鞭笞有官繫卯申洞然宇宙閒餘此自在身但恨不  
能飲我亦無事人

金陵節婦王氏閨幕官闕文興妻也文興死

漳寇地遠不能返葬火其骸王氏亦投火死

董伯大

名浦

夫為婦之綱義與君父俱結髮為夫婦生死誓不渝奈  
何俗日降詩詠淇梁孤衛風首柏舟萬世昭良模傷哉  
闕氏婦故家石城隅從夫事戎幕遠涉瘴癘區一旦失  
所天曷託千金軀昔為堂燕雙今為鏡鸞孤平生繳日  
心肯受行露濡捐身赴烈焰如雪投紅爐夫以身殉國  
婦以身殉夫忠貞各自効節義同一塗飛魂逐炎煙殘  
灰委寒蕪行路為慘怛卓行絕代無茫茫海夫鶴寂寂  
霜林烏天倫事至重世教孰與扶潛德苟不彰何以厲  
下愚賴有直諒士紀實悲遺珠堂堂忠傳筆耿光發幽  
姝篇章極摹寫是乃良史徒

題鉛山陳君實聚遠樓三首

張士敬

我登聚遠樓四望山巖巖山光似爭席面面送晴綠寥

裁碧落雲可以縱遐矚人棄我乃求充然遂吾欲  
豈云太華高高視一拳爾豈云昆侖遠遠視不盈尺曾  
中包八荒芥納九萬里公何遽如許即遠當自邇  
聚銅銅可山聚金金可谷聚易散則難人生貴知足何  
如聚遠景領覽在吾目卷舒一笛閒母勞費童僕  
次韻湯昭翁述上饒道中神祀見疊山謝公咸  
淳未題壁言時相張伯遠名趙離名張伯遠  
英雄豈不死隱忍全親年一朝得所歸大節非細繁生  
氣貫北斗高風肅祁連尚懷艱難際天遠無路言至今  
古道傍直筆書不原顛危遂彼相猛士徒在邊茲骨朽  
亦已千載猶腥聞曆運有興替仁世方缺延賀監記殘  
壁令威忘歸仙想當盤礴時慷慨迴長鞭士偶果何神  
猶能護茲全乃知天有道青史烏足傳有客賦楚屈無

人歌齊田感子古意長凄吟不成篇

古別離

生別真別離死別魂可接問君何能知夢寐固不隔死  
別則相從生別死未得萬里有征人九泉無戰國

浙江潮

疾雷宣天威怒潮泄海氣陽機運無停不受陰所制逆  
流豈其性剛力激之起初疑鬼神使久覺造化理天地  
與低昂魚龍頗軒輕壯哉此巨觀直自開闢始舊聞海  
更東別有蓬萊治樓船去不歸潮水依然至吳兒亦輕  
身尚弄沼中戲朱旗閃翠蓋出沒浪花裏馮河聖所哀  
百年會有死死不作子胥生當隨范蠡

寓言 徐一甫號天樂

苦樂有冥定結髮與君婚中道棄我去白馬駕華軒燕

趙足佳麗吳楚多嬋媛妾自守空房蠭蛸網妾門妾身  
當自愛敢謂君少恩

秋懷二首簡鄭景尹 陳元弼 名良臣

涼風鷓鴣鳴秋色雨中老閉門少來客落葉紅可掃幽  
林鳥爭宿晚景山更好夜靜悄不眠寒螿叫秋草  
慷慨中夜起開窗見星流月明樹影疎秋聲響蕭颯  
入天一方欲往道阻脩念之不成夢從之邈無由彼雞  
亦既鳴君子將焉求

李陵泣別圖 江叔載 名望

黃雲黯將莫白日寒無暉送客渡河梁惆悵難別離胡  
馬雖善行按轡姑遲遲初心孰予察後罪甘誅夷君老  
既堪去我乃無家歸陽春滿皇都長負平生期

題張仲美自得齋 湯思敬 名禮

眾流同一原一本貫萬殊茲理苟深造自得固有餘張  
侯名齋意取彼孟氏書進為豈無方結構便所居住木  
蔚四時流水環前除於焉既有得民物吾與俱俛仰心  
自寬天地吾其廬

新年書懷 王道章 名璋

蕭蕭十日雨苒苒半月春閉門坐寥閨人境無來塵靜  
觀宇宙聞萬象陶化鈞而我不易操楚楚難華身急景  
勿可貸白髮日益新耕閑惜疲犢釣寂吟涸鱗生計固  
已拙吾寧守吾貧

題鐵山卷

冰山不可倚銅山未為榮寵極必見奪勢盡還自傾今  
子異於是乃號鐵山名動以鐵為操靜以山為形况乃  
百鍊餘陶冶切已成卓立天地間歸然使人驚莫作繞

指柔所期常錚錚聲名從此大拭目看崢嶸

題劉秘監為程如章作兩山圖

三山仙子宅五嶽神人居舊聞兩山閒惟著隱士盧程君得其所不與盤谷殊野服縱疎散日與樵夫俱東看紅日上西看白雲舒相看兩不厭盤礴足自娛伊彼老泉翁木山以假為中峯屹自况傍比大小蘇所樂固有異異中果何如秘監倘知此落筆難成圖

乙酉九日同月德明董宗文登高

程景伊

式號有篤

陰氛滌玉宇霽色展初旭良辰動好懷三五縱遐矚因勤東山雲邀我舉雙足飄然升其巔飲酒歌一曲落帽孟參軍千載名見錄漉巾陶先生洒洒清可掬杜陵倩整冠胡乃太拘束我今對西風迹已脫邊幅手摩綠絲

鬢顛倒插黃菊

遊小石城

馬子尚

名志仁號尚志齋

晨登石城山迢迢適艱阻浮雲斂層巒白日照榛莽風景妙莫測形像歷可數武夫擁前關銳士列環堵周遭森戈戟旋折耀旌鼓突至犀象驅奮躍虓虎怒蝥弧更同麾臨衝失威武瀑布飛縋懸沈竈老龜勞中有運籌室金鐵鑄門戶帷幄繞三匝堂陞雄九廡玄深邃梯壁營衛富譙櫓叱咤黻雲氣生吸忽電光吐共工嘆無為媧皇笑難補蒙恬有餘愧飛將欣快覩縱觀自棲遲適意忘疲苦共惟我聖皇方事干羽舞底用石頭城折柳足樊圃寄語山中靈俗客還須杜時用不我需留作神仙所不見赤城峯尚使劉阮聚

元亮南歸

常仲微

名冲藍田人



人生百年期奈此日月駛同心隔山水悠悠兩愁悴三  
年再相過涉彼萬餘里茅亭盍朋簪芝蘭本同氣風雨  
夜不眠談經每心醉今晨又言歸執手慘垂涕秦嶺雲  
翳空灞岸柳搖吹誰言食藥苦未試別離味願保千金  
軀無羞古人事

大極梅梢

熊勿軒名未字去  
非建安人

弄條倚南枝剥落見根柢形容若外槁精腴實中羨偃  
蹇勢難屈清風塵不滓自怜方寸微未發正如此

小春梅蕊

四野積陰沍九地微陽升特立表節操孤芳見精神矯  
矯山林姿益益天地心自此一充拓萬宇同吾春

送鄭南仲赴昌化主簿

劉聲之名漢三  
山人

熙寧言利臣官好面堪唾儘矣鄭介公直聲千古播幾

業有此孫能倡眾莫和湖學四五年氈寒不禁坐况投  
萬山中瘦馬仍縣佐試訝鸞栖林何如蟻旋磨傳聞邑  
父老置酒預相賀此士多讀書愛人不可貨今年秋風  
高勿畏茅屋破但慮執法家需君警貪墮白雲繚山腰  
窻竹累千箇坐念老廣文德尊猶坎軻縣庭一分寬百  
里減寒餓苟無澤物心卿相徒爾大版牘焉足稽絃歌  
故非過起瞻東壁明詎患南箕殷時訪隱者廬談餘曲  
肱卧公田定幾何適半種粳糯

題山外歸人

胡汲仲

名長孺永康  
人寧海主簿

結屋北山阿境趣適有契閑寂聊悅心深密非避世誰  
令賦遠遊山空冷蘭蕙人閒萬得畏欣戚隨所制頗似  
觀優冷笑語雜悲涕戲弄刻漏閒陳迹安足寄策杖歸  
去來溪深亦朝厲陟嶺見我屋竹栢松杉桂雨餘青一

色淨埽如作筆行可休此足無言得深詣

擬古二首

毛靜可

高堂列綺席賓御何委蛇粲粲金芙蓉春葩照蛾眉檀  
槽起清籟鐵撥弦鷓鴣難抵聞筵中曲不聞曲中詞蕭蕭  
青冢魂化作秋雁歸玉關去時淚點濕朱絲豈知哀  
怨情及此懽笑期彈者錦纏頭聽者金屈卮但令今人  
樂不惜古人悲

野色倏已暝零露沾我裳行役悲險艱仰愧歸鳥翔羈  
愁浩難收壯髮日已蒼遠林煙火微投宿扣村庄居人  
畢刈穫笑語并曰傍問客來何疲母乃仕與商所慎在  
出門奚怨中路長

寄舒元易

李仲公

名存番  
易人

昔聞舒子言今已向三載可憐下愚者孳蔽不自解百

年真倏忽况此弱而海嗟子古之徒非體辱相采絕伶  
溝中蛭豈識江與海江海未云足天覆而地載明年亦  
多幸稍已開柵械青青溪上山誓欲從子邁倘或與所  
聞雖死亦何悔

和張仲舉見懷

滛流冒郊郭昏墊如堯年坐令意中人十日墜周旋問  
信既為俗見懷斯有篇若人妙詩才華星釁秋天沈鮑  
不足避曹劉直欲肩時來林下居密竹涵清消戶牖鮮  
云異言談多所然世情有衰隆古道無陳鮮願為盤中  
漆莫作弓上弦盤枯漆不落弦枯弓自捐

汪主簿清明不出見寄

人情雨中花客情松上煙苟非薛下門何以歸龍泉附  
驥知自遠慕羊徒得羶君看長舌人早晚乾無涎所以

汲太守穩作淮陽眠昨日出東郭風榆吹綠錢流光一  
何情去我如郵傳道逢誰家子饌奠號新阡感此不能  
已戎笳吹晚天

和信之板橋路中古風二首

杜仲梁 名仁傑

岸風坵枯凌野日明遠燒山晚雲煙深遊子悲嶮峭平  
生文字僻所歷入吟嘯急景不貸人佳處領其要  
木杪來江光中途憩消搖佳人在空谷尺素昔見招徒  
老黃塵中愧爾漁與樵永懷梁父吟日暮風蕭蕭

髮黃有感

飄蕭中年髮既少何用白蒼黃未甚絲明知不更黑妻  
孥恐生悲勸我課鉏摘眷然撫鏡鑷青山墮虛席

贈楊古淡

何夢桂

號潛齋  
嚴陵人

南山有岑樓岑樓高落星娟娟樓上女悠悠撫朱繩當

年猗蘭操翻作長短吟世無千古人但遺千古心心長  
韻逾遠疏越難可尋曲盡無人聽月落霜滿城

和荅李德臣

劉會孟

名辰翁  
廬陵人

忍寒一百五何開落忽忽華堂托孤根棄我荊棘中味  
言隨時變茗薄酪自濃蛺蝶金縷衣更為悅已容雖無  
蛾眉妬懷抱常忡忡

屯田作

劉衡

為吏勿稱能為政勿稱奇能吏尚苛刻奇政少恩慈十  
年從薄宦此理漸次知吾敬民何慢吾信民何欺一有  
所未至庶事墮而墮風俗久澆漓尤當教誨之懲一以  
戒百底用勞鞭笞大官勸農至軒蓋如雲馳條畫動十  
數應報無停期養民如養樹郭駝誠良規安知一牛死  
全家老稚飢見之不敢語回首長嗟咨陽城下下考甘

責吾何辭尚愧志未勇歸來誰汝疵

題姚樵雲主簿卷

尹仲明

巴歌混雲門章甫變鷄羽大雅無知音滅没何足數而  
我不量已冥搜徒自苦風月入吾手草木亦掀舞終然  
墮習氣未見脫塵腐先生不羈人雲閒弄樵斧運思琢  
山骨下筆疾風雨解后所好同訪我青楓塢始疑神明  
逸乃見武功簿論心若平生忘形孰賓主桃李俱塵埃  
青松日高古示我摩尼珠紅光照窓戶至瑤不可玩雋  
未宜細咀傑出固橫放頓挫更媚嫵尚當論千載豈與  
魯等伍若以法眼觀盍嗣涪翁祖且截葛藤禪一笑喫  
茶去

始皇

秦皇吞六國制度早先王復道象天極長城亘朔方盧

生偏饒舌衣冠竟離殃刀筆握八極詩書終壁藏赤子  
遭天闕一已思壽康神仙在何許鼓柁凌茫茫湘山雖  
可赭弱水終難航脩短自有定早為山鬼量六合正焦  
槁雲氣生芒碭

四皓

商山鬱嵯峨高風襲人清冥鴻竟長往人閒但聞名乃  
從吾兒遊忽使隆準驚我冠華岳聳素髮秋霜明恭敬  
豈足重慢罵安能輕紫芝了晨昏焉用加璧迎誤墮良  
術中僅勝口舌爭誰謂四老人不如魯兩生

題畫史朱好古卷

李季和

真宰皦囊籛笑睨造化爐鼓金鑄賢智搏土作下愚畫  
史天機精竊見造化樞盤礴解衣縱當軒紙鉛朱沾塗  
狡兔翰神氣如走珠手掣巨鰲簪瘳革生肌膚六丁拔

山來下無根與株海風吹之凝累累插江湖其中有幽  
人傲兀不可呼已知畫手好令我心踟躇五湖風雨夕  
逢去理釣舟子技亦精絕白玉無疵瑕誰能薦天子遣  
之畫雲臺一朝被賞識富貴真萌芽但訪青牛君乞受  
黃金壺

題梅卷

北風吹倒山三日雪塞門惛惛巖谷裏萬木命在根天  
翁粲然笑洗出明月魂春如鼎中香已覺火力温

題淵明圖

張惟中

野鶴唳層霄白雲度幽谷諒彼曠士懷焉能受羈束一  
官聊復爾流光亦何速公田半種秫惟恨酒不足胡顏  
揖小兒拂衣謝流俗時得斟酌賢頗謝顏光祿鬱鬱澗  
底松采采籬邊菊匪茲風霜姿疇能伴貞獨

陪揭先生暨諸公宴集東山分韻得還字

有客謝塵鞅結廬泉石閒而我思會面褰社扣柴關良  
朋既簪盞眷然開我顏沽酒斟酌之白日有餘閑天清  
霜鶴唳迥若非人寰風吹松上雲杯中見青山醕酌何  
所言逍遙以忘還

答呂玄卿教諭白髮詩

我有白苧衣惟恐塵土黑不謂頭上髮秋霜變成白衣  
黑猶可澣髮白徒用摘摘之又還生旁人笑何益黑者  
日漸稀白者多於昔覽鏡一茫然邈如不相識思欲養  
還丹復此舊時色遠尋安期生仙訣未由得衡門掩蒼  
苔頗似楊雄宅于中尚守玄杯酒聊自適

題沈氏三節婦卷

沈氏有孀居初聞惟娣姒不謂婦亦然同心誓生死使

者廉問之嬾也誤辭旨旌書表雙桓婦名獨不紀得失  
復何言相看俱老矣當時撫諸孤詎欲望褒美我觀栢  
舟詩國風一人耳一門而有三今古實罕比綱常天地  
閒賢者能守此蚩蚩忘義人胡顏過閭里

挽倪仲權處士

丁鶴年

維郵有高士乃居城北門伯叔列茅土弟昆羅摺紳先  
生視富貴蔑若行空雲蕭然坐一室詩書日討論忠信  
化閭里孝友敦親姻用茲以歿世入亡道彌尊我昔客  
東海託交見天真犖犖金石義藹藹骨肉恩豈意隔生  
死相思勞夢魂尚怜靈鳳毛符彩備五珍每過話疇昔  
相對淚沾巾我悲匪兒女所感在斯文

悼亡

別時如玉人歸來死生隔日暮泣孤墳音容杳難得惟

餘墳上草猶帶羅裙色

歲晏百憂集二首

歲晏百憂集獨坐彈鳴琴琴聲久不諧何以怡我心拂  
衣出門去荆棘當道深還歸茅屋底抱膝梁父吟  
歲晏百憂集擊筑發商歌商歌未終調淚下如懸河故  
鄉渺何許北斗南嵯峨我家不可歸無家將柰何

奉懷九靈先生就次其留別舊韻二首

晴霞照眉霄淑景媚清曙冉冉草際煙盈盈花上露幽  
禽何處來飛鳴入庭樹不見心所親坐待傳雲度  
攀桂月扶疎撫松雲陸離豈無淡蕩懷亦有幽貞期何  
緣對清景孤坐度芳時故人不可見新交非所知

題畫二首

天連翠障開雨挾銀河瀉中有澹蕩人於焉結茅舍朝

漁曲渚湄暮獵平林下危途策羸驂汨汨胡爲者  
荒荒野日低漠漠江雲冷喬林延暮光澄波浴秋影高  
人千載懷乾坤一漁艇

早秋偶作寄宋景瀛二首 吳立夫

西風吹梧桐一葉兩葉積故書翻有塵雄劍掛在壁時  
非合窮困事到即輝赫除却雙鹿行門前少人迹  
北山有古寺脩竹炎天涼蛟龍踞兩澗鶴鶴鳴層岡心  
臺月照白鼻觀煙通香可思未到詠此招隱章

大食餅

西南有大食國自波斯傳茲人取解寶厥土善陶埏素  
餅一二尺金碧粲相鮮晶熒龍宮獻錯落鬼斧鐫粟紋  
起點綴花穉蟠蜿蜒定州讓巧薄邛邑鬪清堅腕指滑  
欲墮凝瞳冷將穿逝我賈胡力直致鮫鱓淵常嗟古器

物頗爲世所捐襍衫易冠袞盤盞改豆籩禮圖日以變  
戎索豈其然在時苟適用重譯恣來前大寰幸混一四  
海際幅員縣度縛繩紉娑夷航隔船鑿空發使節隨俗  
混民編漢玉堆積笥蕃羅塞鞍韉城池信不隔服食奈  
溘遷輪困即上據鼎釜疇能肩插葩奪豔冶盛酪添馨  
羶當筵特見異博識無庸詮藏之或論價裹此猶吾甌  
珊瑚尚可擊磧路徒飛煙彼還彼互市我且我栝圈角  
貓獨不出記取征西年

飲酒

我昔不解飲病來持一觥一觥亦已醉二豎敢相撓忽  
然秋毫大况乃泰華輕豈其陰陽足妄使龍虎爭冰蠶  
冰爲山火鼠火烘城一元本同氣萬物却異情機關有  
大運稟受通群氓轉移苟不定顛倒尚何營百年定幾

時愁賦空餘聲蹠蹠起自鑑面目吁可驚試攀松樹枝  
復攬芝草莖但當盡此酒不在學長生

題天台山張節婦卷

古人重首教夫婦係民彝自從初御輪禮有親結縞百  
年主家室中饋務倡隨盜先苟不待從一幸無虧世途  
日趨下貞節誰肯持於焉見管蒯早歲哭總帷荼毒守  
几席惡筵毀容儀日夕執醑奠春秋動悲思病姑坐堂  
上躬養我危匝稚孩倚床側慈訓我書詩奉老當以終  
撫孤敢如遺白頭誓不爽黃土詎有知我生何惻惻我  
死迺吾期惜哉歡娛際捐我少艾時鸞鏡塵已蝕錦衾  
淚還緇史管獨不煒春裳忍為私因之念三季似此實  
女師谷風或棄背行露且陵欺詠歌可勸諷開卷益嗟  
咨從來桑濮地不廢栢舟辭

浦陽舊有明月泉久而不應今乃疏道其源似  
頗與弦望晦朔之間相為消長者遂作是詩

大區何渾淪元氣乃潛洩忽然為山水無往不融結造  
天偶一照厚地空餘列盈將光共生涸與魄同滅玄機  
自消長至理誰圓缺發揮雖有在窺測尚未決枯查曾  
幾棲斷狀遽中裂半倚嵐翠雲微通海潮雪昔人來推  
求於此得表絕虛亭奚其敞靜甃獨不嚙歲年竟悠遠  
沙石漸填咽寧加疏瀹功肯使見聞褻恍疑合圖經環  
坐到稚耄倘非懈投碣幾類鮒處轍纖纖浮晶采湛湛  
浸寥泬舊觀方爾還真源可吾繼爭言彼月行豈為茲  
泉設蕭丘胡長寒漢井或再熱逝尋白兔公直探神龍  
穴狂歌水仙詞擊碎如意鐵

和陶淵明詠貧士



人生自沈靜豈得非意干宜哉揚執戟三世不徒官窮  
冬無完褐盡日止一餐羨芹終不獻晨曝尚餘寒手種  
老松樹蒼然霜雪顏政爾有佳思清風吾掩關

秋夜不寐觸物感事雜然成章言無流例適興  
而已凡十一首 許益之

秋風撼庭樹涼月流素輝蟋蟀鳴床隅飛螢入羅幃憂  
來不得寐散步褰我衣感此時節換種種雙鬢絲羲軒  
大聖人寧復留今茲陰易幹元化委順夫奚疑願堅樹  
德心沒身以爲期

庭前餘晦地性頗耆甘菊種苗日已長時至酒亦熟携  
壺對秋英朝夕共幽獨春風拂嘉樹朱紫粲溢目蹙金  
羅裳衣新聲閒絲竹此日胡不樂日月如轉燭霜露締  
絡清寒香謾盈掬子意人所從余樂矢弗告

巍巍岱嶽尊蔚爲衆山宗東南聳日觀赫赫初暎紅在  
昔七十君登封告成切上有古車轍我欲求其蹤大門  
險而豁小門曲以通攀緣至中道力盡無由從  
鳳凰甘竹實麋鹿樂食薦生民宜室家展矣求邦媛絕  
代有佳人窈窕無情盼蹇脩爲我理佩纒結繾綣庶幾  
百年心解后今夕見壁彼七襄女迢迢隔河漢焉得授  
君綏徒能覲君面

我家東國洛高賢甲中州良田藝稻秫桑麻翳連疇嗟  
彼日月除夙駕將遠遊煌煌幾名都挈挈懼不周朝遊  
百花園暮飲倡家樓何當據要津快意酌恩讎忽忽崦  
嵫景須臾爲誰留幡然憶故國惻惻徒心憂致遠豈無  
車濟盈亦有舟子胡不來歸狐死知首丘  
芍藥貯春秀穠姿弄柔媚擬笑已傾城衆芳詎能比摘

華不食實何如菽粟味括談竟危趙寧愚乃存衛有斐  
世所欽敦行古來貴

首山終身卧莘野三聘起去齊接浙行梁招車暫止春  
雨膏群物淒霜草秋靡柔轡驅駘駘祖道別閭里瑤池  
王母居計日策可指羊腸盤太行汜沙導弱水咫尺不  
得前良圖非謹始願爲雙飛鴻栖息清江泚

昔有狂接輿躬畊樂其貧楚使致君命金車爛盈門先  
生笑不應行留尚逡巡一朝感妻言迹遁聲不聞惜哉  
先生賢智不及婦人

昔有北宮子懷德不自知衣褐食糲糲陋室剪茅茨因  
人論窮達自失偶偶歸道逢東郭生言天釋其疑迨然  
將終身始悟非人爲君子貴聞道匪石不可移胡爲浪  
動心戚戚還嘻嘻

盈盈谷中花皎皎當窈女朝衣日窺鏡揚替還自許風  
雨淒暮春花飛返無所玉顏長不改恥與施嬙伍一朝  
歸度朔骨肉陰爲土飾貌不飾心泯滅何足數  
何山名不周疇觸天柱折女媧上智人煉石補其缺日  
月軌道行共辰衆星列從茲轉大鈞萬物欣以悅堯年  
水襄陵湯世九澤竭瑟調柱奚膠壁白緇不涅愚公猷  
王屋胡寧一簣撤孫子傳其愚千載名未滅

青青巖下松猗猗澗中蘭長山饒靈異佳氣長鬱盤尚  
論多招人逸駕不可攀舊聞赤松子牧羊在茲山安期  
煉五石奕具白石閑食霞吸沆瀣松下時往還振袂登  
前岡高揖凌雲煙姑舍御風術且復羈鞅寬

題浩然齋

元氣塞太虛闔闔理昭著惟人萬物靈剛大鈞所賦貌

然配坤乾豈不以是故安行孰能希智鑿失其素呂梁  
東河流疾風水奔注苟無操舟術咫尺不可泝康莊範  
馳驅千載積跬步務茲芸苗功無為握苗助秉心慎終  
始恢乎有餘裕齋居日已省日擊內環顧名言諒非艱  
允出乃其庶

上李照磨

中原清淑氣世代生偉人伯陽孔子師千載今雲孫窮  
經入闡奧探道提綱綸襟懷洒秋月論議開愚昏大材  
古難用暫屈寧久伸要當推所學利澤均斯民

自挽

天賦

葉景南

至正辛卯秋天賦我人屬不肖且不愚無榮亦無辱倏  
忽八十三光陰一瞬目有生則有死我死非壽促昨暮  
同為人今日在鬼錄魂氣散何之遺骸寄空木親友弔

之哀兒孫撫我哭人以壽為奇我以死為福但恨在世  
閒讀書不得足戒爾諸子孫聽我叮嚀囑佛事切莫作  
作之反褻瀆佛言四相非焉能有地獄先賢有格言莫  
信浮屠局

古瑟

張光弼

錦瑟古之樂造自軒轅聞朱絲五十絃柱列鸞鷺班中  
有洞庭水白日興波瀾人文際昌期出應清廟彈洋洋  
雅頌音一唱而三嘆神人既以和鳳鳥翔其翰聖明御  
天下百靈咸仰攀

讀離騷經

三閭楚同姓怨生於所愛讒人在君側繩墨日佞背虞  
茲宗社隕繁辭冀收採反覆三致忠九死猶未悔靈修  
終不察遂投汨羅內斯文幸未喪風雅接三代豈惟南

國士汲汲仰霑旣

古詩七首

稱衡輕狡人况以才自負將赴漁陽過梅人還自悔曹  
公豈容物嫁惡與黃祖值茲動勦際焉用鸚鵡賦所以  
賢達士貴在識時務

嗣宗絕感否善若處時晦詠懷數十篇倬爾追漢魏駕  
車哭而返此豈無所謂嘯登廣武臺神氣偶相會從來  
個儻心士首視富貴惟有步兵廚可用時一醉

淵明君子儒心事甚夷曠醉來得佳眠自謂羲皇上文  
章固可講節槩尤所仰且無州縣拘安得言不放託志  
聖賢錄千載成絕響

高人王右丞輞川亦有樂位居尚書省志不異丘壑誰  
言肉食鄙而不事澹泊辭擅大雅名集多應制作唐音

得所宗夫子寔先覺

工部行在官飢寒莫與比奔走盜賊中朝夕命如寄一  
飯不忘君危言以鳴廿親蒙萬乘知不救妻子累文章  
天地閒風雅可無愧賦者謾接迹此作竟誰繼

襄陽孟浩然五言擅時譽迹放羈旅閒氣藉江山助感  
懷峴山作託興洞庭賦九重獲見知一語乃上忤弊廬  
南山歸亦足蔽風雨篇章如可傳可傳遇不遇

蘇州韋刺史早事武皇帝既蒙南宮錄復膺符竹寄折  
節就繩墨檢身勤治理賦詩長日靜靜閣餘香至晚逢  
揚開府感激道所以宜爾金玉音風雅存遺製

拙逸詩

守拙中乃逸用智機或生所以抱真士泯焉黜聰明賣  
藥不二價懸壺無姓名逍遙城市閒心與造物并鶴長

斷則悲見短續則驚萬物有常性巧偽非人情乘黃一  
剪拂千里無留行賢哉拙逸翁可以為世程

題簡掾辨誣卷後

種蘭雜荊棘棘長傷蘭根結交或匪良中道生謗言所  
以明拓士慎之非一門羨玉累卞和明珠誣馬援終焉  
各有辨暫屈寧為冤

壽光宮訪道士不遇留題

高阜臨大溪激流喧眾石中藏壽光宮年深翳金碧儼  
然天人尊羽衛何赫奕回廊蔭古木苔蘚少行迹傳昔  
丹霞士於斯鍊金液丹井雖尚存鸞鶴無一隻徘徊長  
松下瞻望雲氣白不見種桃人惆悵理還策

種德堂為岳鑿士題

種德不在淺種藥不在深雖有千畝地不如方寸心種

之百年後所得非尺尋忠信乃佳實慈愛為繁陰如有  
仙人杏一核延千林以此惠後嗣安用多黃金

百馬圖

畫師畫馬時心與馬為一精神各自分萃此馬百  
起卧適馬性踉齧通馬力逸如龍在水馳若虎而翼遊  
得群聚風騰各相及或滾塵沙黃或嘶草芽碧豈無麒  
麟骨松下鹽車泣誰將朔漢大圖畫歸咫尺曹韓不並  
世按圖為爾惜

送周東甫

黃元鎮

名鎮成  
號存齋

西風吹長林寒月流高秋雖雖鳴飛鴈送子以遠遊遠  
遊何所好山川誠阻脩白露墮蒹葭清寒生敝裘徘徊  
在中路念子行且休朝發扶桑館夕登崑崙立手中琪  
花春長揖不可留高堂八十年反哺待時羞歸來釣雙

鯉已具西江舟

天池石壁為鍊雅賦

張伯雨

多天雨號句自外史錢唐人

嘗讀枕中記華山閔中具神泉發其顛青壁繚其隅春風四山來群綠互紛扶羽觴曲折行浮花與之俱採珠奉薛荔洗玉弄芙蓉聲叟頗好名石窪作魚湖鴈乙志草堂挑煙遂成圖而此滌煩磯閱世如搏蒲發興雲林子盥手與我暮居然縮地法挈入壺公壺

送象先鏡上人歸南昌

釋碧虛

名道充

赤霄有紫鳳文彩光陸離不肯阿閣巢寧受樊籠焉垂翠筠實翳翳梧桐枝豈無食息好遑遑欲何之社殿激長翮群翼何由追還作朝陽鳴尉此長年思

文翰類選大成卷第二十五

